


CIMANYINU

 ...kubala kwa Dîyî. Bwa mudimu wà dyoya naawù, cingänülòmbedi bwa kujuukila kuulu...Pàdìbo bimba *Dibèndelà Dilamika Mitootò*, nutu nujuukila kuulu. Kì mmwômò anyi? [Disangisha didi dyamba ne: “Mmwômò.”—Muf.] Kàdi bwa cinyi kubènga kujuuka bwa Dîyî dya Nzambi? S’nkaneemu. Mpindyewu mu Mukàndà wà Ekèsòodè amu, nshapità wa 12, tubangila ku mvensà wa 12, ndi njinga kubala katùpà kàà Mufundu, mvensà wa 12 ne wa 13.

Bwalu nêmpicilè mu ditungà dya Èjiiipitù bufuku ebu, ne nêntuutè baanàabutè...mu ditungà dya—dya Èjiiipitù, ne ku bantu ne ku bimunà; ne...nêmfilè dilumbulwisha dyànyî: Mémè ndi MUKALENGE.

Nenku mashi neikalè kunùdi bu cimanyinu pa nzùbu unùdi nusanganyiibwa awu; nenku pângààmònà mashi, nêmpicilè pamutù peenu, ne cipùpù aci kacýàkulwa pambidi peenu bwa kunùbutula to, pângàátuutà ditungà dya Èjiiipitù.

2 Cyena-bwalu cyànyì cìdi ne: *Cimanyinu*.

3 Twinyikààyaaku mitù yetu mpindyewu. Nenku mu cinyàànyà Cyèndè cya cipòòlu cinsantu eci, kumpàlà kwa twètù kuseemena kùdìYe mu disambila, kùdikù dilòmba dinùdi baswè bwa Nzambi kwandamunaYè mu mapingaja emu anyi? Elàayi anu byanza byenu muulu cyanàànà pawikalà naadi, ne wela meeji munda mwa mwoyi wèbè cyùdi muswè bwa kwenzaYè. Mwaba kanà wònsò mu citanda emu, ela anu meeji cyanàànà cyùdi muswè bwa kwenzaYè.

4 Taatù wetù wa mu Dyulu, Wèwè udi Nzambi udi kàyì ùshintuluka, nenku tudi tulòmba bwa Wèwè kwandamuna ku masambila ètù, mu mapingaja emu, pa—patùdi babàndishe byanza byetu apa. Ne Wèwè udi mumòne ne byànyì pàànyì byanza mbyela muulu. Ne dyànyì dilòmba, ndi ndimanyisha patòòke, ndya ne, Mukalenge, Wèwè neòndopè muntu yònsò mwab’ewu leelu ewu, nèusungilè mujimine yònsò. Mpindyewu, Wèwè utu mwambè ne: “Nwènu balòmbe Taatù cintu kanà cyònsò, mu Dìna Dyànyì, Mémè nêncyènzè.” Mpindyewu, Mukalenge, tükwàcishèku bònsò pàmwè bwa kwitabuuja bu musumbà wa bantu, wà bânà bàdi biitàbùuje. Akwilàku ku Dîyî Dyebe, Mukalenge. Dîyî Dyebe didi Bulelèlà. Bèneshàku myoyi yetu.

5 Tudi tuKwela twasàkidila bwa disangisha edi. Tudi tuKwela twasàkidila bwa Mwanèètù Grant, ne bwa beena mudimu bèndè bònsò, maèkèleeziyà ònsò ne bantu bònsò. Ne bwa byònsò byÙdi mutwènzèle, Mukalenge, tudi ne kusàkidila Kùdi. Taatù, kùdi

mwa kwikala bààbúngì bàà kutùdì kaaba aka bìikalà kabàiyikù mwa kumònangana kabidi muntu ne mukwèndè mpindyewu to, anu to ne patwàmònanganà luseke lukwabo. Edi didi mwa kwikala disangisha dya ndekeelu mutwikalà basòmbe bônso pàmwè pa buloba ebu. Swàku bwa Nyuma Mwímpè àlwe àtùbènèshè bônso pàmwè, àtùkùmbàjilè majinga ètù. Mu Dinà dya Yesu mmutùdì tulòmba emu. Amen.

Nudi mwa kusòmbaayi.

6 Ndi ne kàlùpè kakese kaaba aka, mùndì mfùnda Mifùndù ne tuntutu tukese. Kale wàwa mwakù mwa kubivùluka mu mutù, kàdi ngáfùmu ku dipita bidimu makumi abidi ne bitaanu, nudi bamanyè's, mbwena kwamba ne, bwa musangu mwibìdì. Nenku dîbà adi ncyèna mvùluka mùmwà ne ciibidilu cya kuvùluka amu to, ne bantu búngibù bapàte mu masangisha ne bikwabo, ne bintu búngibù bya dyanza.

7 Cyena-bwalu cyetu mu mapingaja emu cidi ne: *Cimanyinu*. Cyalu cyetu cidi cyùnzulukila mu Èjiipitù. Ncimfwànyì cinène kaaba aka mpindyewu, ndi muswè nwènu bônso nùcimònè ne nwikalè anu ne kaneemu kônso. Èjiipitù ki mwaba wà cyalu aci, ne cikondo cya cyalu aci cidi anu ku ntwadijilu menemene kwa Ekèsòdè.

8 Nenku, mpindyewu, ncifwànyikijilu cya leelu ewu, cileejibwe, patùdì peetu tukungamangana ne cikwabo cimwangì apa. Nzambi munkaci mwa kupàtula Izaleela mu Èjiipitù, ùya naabò ku buloba bulaya, civwa ncifwànyikijilu cya Kilisto ùpàtula Mukàji-musèla mu ekeleeziya, ùya ku Buloba bulaya. Tudi mu cikwabo cimwangì. Mpindyewu bu nwènu mwa kulonga Mifundu, tudi twètù ne dîbà anu dya kulenga myaba yàcì minene, aci ncilelèlè. Twètù tudi... Anu mwàkapàtulà Nzambi ditunga mu ditunga amu, Nzambi neàpatulè Mukàji-musèla mu ekeleeziya. Mukàji-musèla neàbiikidiibwe bwa kuumuka mu ekeleeziya yônso. Yèyè ngwìkala musungula wa Nzambi, ngwapàtudiibwa. Ne twètù tudi pabwipi menemene ne cimwangì aci patùdì twakulangana apa, bwalu tudi ne cileejì cyônso cya mu Mifundu cya ne ki mwaba wutùkaadi biimàne. Mpindyewu, ndi mumanyè ne aci cikaadi cyambiibwe misangu ne misangu, kàdi, mulundà wanyì, mungà musangu necyambiibwè bwa musangu wà ndekeelu. Cikondo necijiminanganè mu Cyendelele dîbà adi. Yèyè ùlwalwa bwa kwangata Mukàji-musèla mu ekeleeziya.

9 Cimanyinu ki cintu civwà cyènta dishiilangana pankaci pàà Èjiipitù ne Izaleela, matungà abidi awu. Bônso bàvwa anu bantu, kàdi bônso bafùka kùdì Nzambi, bônso mudimu wà ku byanza bya Nzambi, kàdi, dishiilangana pààkapitè cibawu cya lufù, dishiilangana pankaci pàà mwoyi ne lufù civwa ncimanyinu aci.

10 Nenku ki mwikalàbi kabidi ku dilwa dya Mwànà wa Nzambi, pààpàtulàYe Mukàji-musèla mu ekeleeziya apu, dishiilangana

nediikalè Cimanyinu aci. Mpindyewu, nùteelejàayi ne ntèmà mu mapingaja emu, ne nùmonàayi ní kí ncilelèlè. Cimanyinu ki cìikalà dishiilangana. Bikèngela kwikalè dishiilangana.

¹¹ Nzambi neàlumbulwishè bàà pa buloba, dîngà ditùkù. Mémè mukonkè beena Katolike ne: “Wàlumbulwisha Yè nganyi, Yèyè neàlumbulwishilè bàà pa buloba ku cinyi?” Mbafwànyine kwamba ne, “Ku ekeleeziya.” Ekeleeziya kaayi? “Ekeleeziya wa Katolike.” Ekeleeziya wa Katolike kaayi? Yòyi nyayi mitàpe bu mēshì? Ba-Méthodistes mbafwànyine kwamba ne, “Ku ba-Méthodistes,” ba-Baptistes dîbà adi’s mbeediibwe ku luseke. Pashiishe, nwênù babàlumbulwishile ku ekeleeziya wa ba-Baptistes, bakwabo bônso’s mbeediibwe ku luseke. Beena Mpenta nebàmbè ne, “Ku beena Mpenta,” dîbà adi’s bakwabo bônso mbeediibwe ku luseke. Nwamònu’s, mbifwànyine kufila cibwejàkàjì, cibwejàkàjì cipite bùngì, bifila cibwejàkàjì cyàbùngì mu mutu, bwa kutùma meeji ku cintu bu nanku.

¹² Kàdi Nzambi ùvwa ne mushindu kampànda kaaba aka wùvwàYe mwambè ne neÀlumbulwishè naawù buloba, kaciyi ku ekeleeziya wa Katolike to, kaciyi ku ekeleeziya wa Mishònyì to. Kàdi Yèyè neàlumbulwishilè bàà pa buloba ku Yesu Kilisto, ne Yesu ùdi Dìyi, pa nanku’s byálùkidi kabidi anu ku Bible. Nwamònu anyi? Yèyè neàlumbulwishilè bàà pa buloba ku Bible. Ne Bible ki Mukàndà wà Nzambi wà dilumbulwishangana naawù, wùdi dibuuludiibwa mu kaabujimà dya Yesu Kilisto, didi kantu kakwabo nansha kàmwe kakàyikù mwa kusàkidiibwa anyi kantu mwa kuumushiibwaKù to; cibawu cya dicyènza, ncyà ne dîna dyebe nedikupudiibwè mu Mukàndà wà Mwoyi. Shààlaayi anu mu Mukàndà awu, ne lòmbaayi Nzambi bwa àtùvwijè citupà cya Wòwù awu.

¹³ Mpindyewu tudi tujandula ne, cimanyinu, cimanyinu ncinyi? Cimanyinu ncimanyishilu cya ne mushinga mmufuta, ki cidi cimanyinu. Byenzè anu mùdi ku njila yetu ya njanja ne ya bis eyi, tudi twangata mfrangà yetu tuya ku ngàlà. Mpindyewu, nwamònu’s, njila ya bis kí mmyanyishila, mu myaba yidìbo bàkwàta mudimu ne bimanyinu, kí myanyishila bwa kwangata mfrangà to. Kabèenakù mwa kwangata mfrangà to, bìdi bikèngela cimanyinu; twàmbè, bu mùdi ndèkè, ne bikwabo byònsò. Udi uya ku mwaba kampànda, ku meesa a cisumbishidi, ne usumba, ku mfrangà yebe ayi, bimanyinu bùngì kampànda, cimanyinu kampànda eci. Nenku cimanyinu eci ncimanyishilu cya ne mushinga wèbè wà lwendu mmufuta. Udi ne bukenji bwa kubànda mu màzuwà, kubànda mu ndèkè, kubànda mu bis, anyi ní ncinyi cyònsò cìdiku aci, pàdibi ne wèwè udi mukwàte cimanyinu aci ku cyaanza bwa kuleeja ne dibàndà dyebe—dyebe ndimana kufucila. Mpindyewu nùvulukàayi aci. Kanùcipu mwoyi to.

¹⁴ Mwànà wa mukooko wa Izaleela mushebeya awu ki cìvwa...ki cìvwa dilòmbà dya Nzambi. Yehowah wàkalòmba

mwânà wa mukooko mushebeya, mupinganyi uvwa kàyi mwenzè bubì awu. Mutwàlongù mu lumingu lushààle elu mpindyewu ne, Nzambi, pàdìYe wàngata dipàngadika, Yèyè kàtu ùdishintululakù to. Nenku Yèyè wàkapenga njila, cintu Cyèndè cya kumpàlà cyàkenzàYe pààkadishindà muntu, byàkakèngela bwa kupengaYe njila bwa yèyè kwalukila, piikalàbi ne Yèyè ùvwa muswè kumupikula, nenku kwangataYe dipàngadika dya kusungilaYe muntu ku Mashi a Kampànda uvwa kàyi mwenzè bubì. Ne Yèyè mmwenzè cintu cimwecimwe aci bwa kashidi. Kacya Kàtukù mucishintùlùle to. Kakwènakù mwaba nansha wùmwè wàtwilanganà Nzambi ne mukuukwidi to, anu mwinshì mwa Mashi awu. Ki mwaba Wèndè wùmwèpelè ngwòwò awu.

¹⁵ Twètù tudi tuteeta kwenza ne Yèyè àtwilanganè nendè mwinshì mwa tèòlòjì wetù, mwinshì mwa òngumba dyetu, mwinshì mwa ndongamu yetu ya bulongeshanganyi bwa tulaasà. Bàmwè bàkaadi biibàke bibùmbà ne bàmwè biibàke bimenga, Baabùlònà ne—ne cibùmbà cya Baabèlè, ne bintu bishiileshiiàngàne bya mishindu yònsò. Kàdi cìcidi anu cishààle, Nzambi ùcidi ùtwilangana ne mukuukwidi mulelèlè anu mwinshì mwa Mashi. Kàtu ùcishintululakù to. Katwèna mwa kwikala bònsò ba-Méthodistes, katwèna mwa kwikala bònsò beena Mpenta, katwèna mwa kwikala bònsò *cikampànda*, *cikansanga*, anyì *cikankènga* to, netùpanganè ku mèyì. Kàdi pàndì ndwa kùdi muntu, nansha yèyè nsaserdose wa Katolike anyì nì ncinyì cyònsò cidiye aci, pàdiye mwinshì mwa Mashi awu tudi bânà bàà muntu, kùdiye nansha kwikàle penyì, bu mùdìbi anu ne yèyè ùdi mwinshì mwa Mashi awu.

¹⁶ Mpindyewu, mwânà wa mukooko mushebeya wa Izaleela awu nguvwa dilòmbà dya Yehowah, ne mashi àvwa ncimanyinu cya ne mudimu wùvwa mwenjiibwe. Nzambi wàkalòmba bwa bupikudi, bwa kuumuka mu Èjiipitù, bwa kuya ku buloba bulaya, Yèyè wàkalòmba nyama mushebeya. Ne nyama awu ùvwa ne cya kwikala ne. . . Mashi a nyama mufwè awu àvwa ne cya kulaabiibwa pa mukàmbà wa ciibi ne ku ciibi, ne aci cìvwa bu cimanyinu cya ne cintu cìvwà Yehowah mulòmbè cìvwa cikùmbaja. Nwamònu anyì? Mpindyewu, kí mmwânà wa mukooko awu uvwa cimanyinu to, mashi ngàvwà cimanyinu. Mpindyewu, mwoyì wùvwa mupatùke mu mulàmbù awu, nenku mpindyewu mashi awu àvwa cimanyinu. Mèyì Èndè matùma àvwa makùmbaja. Mashi àvwa bu cimanyinu, cimanyishilu cya ne mukuukwidi ewu ùvwa mwenzè anu menemenè cìvwà dilòmba adi. Aci ki cìvwà cimanyinu. Eyo, bu mùdìbi ne mwena kwitabuuja, mukuukwidi, ùvwa dìbà adi mufwànyìkìjìibwe ne mulàmbù wèndè. Nwamònu anyì?

¹⁷ Nzùbù nyèyè *ewu*, ne mukuukwidi, dilòmba dìvwa bìshi? “Kushebeya mwânà wa mukooko. Mu ditùkù dya dikumi ne diinàyi paanyimà pàà bamanè kumulama, mu—mulùme kàyi

ne kalèma to, Izaleela mujima nebàmushebèyè, ne mashi neàngaciibwè ne hizòpà ne neàlaabiibwè pa mukàmbà wà ciibi.”

¹⁸ Nenku, byòbi biine, hizòpà awu ùvwa anu cisoosà cyetu cya ciibidilu eci. *Hizòpà* mbwena kwamba ne “diitabuuja dyebe.” Muntu kampàndà ùteeta kwikala ne diitabuuja dya ditàmbe mfùkilu, s’ki bwa cinyi udi upangila dyondopiibwa dyebe. Diitabuuja dùtu cintu anu cyetu cya ciibidilu eci. Udi ne diitabuuja dya kulwa mu ekeleeziya. Udi ne diitabuuja dya kupàtuka pambèlu pààpa. Udi ne diitabuuja dya kuteemesha kàshinyi keebe. Udi ne diitabuuja dya kudya didya dyebe dya mundaamuunyà. Ki mushindu wùdìbi, anu diitabuuja dyetu dya ciibidilu edi. Mpindyewu bwa kulaaba mashi, bàvwa bààlaaba ne hizòpà, cidi anu cisoosa cyetu cya ciibidilu eci cidi cìtòloka mwaba kanà wònsò mu Pàlèstinà, bileeja ne diitabuuja didi mashi àlaabiibwa naadi adi kì ncintu kampàndà cya citàmbidile cya ne bikèngela wikalè ne màpòlomè ònsò a bu docteur bwa kucyènza nansha. Didi anu diitabuuja dyetu dya ciibidilu, dya matùkù ònsò edi, bwa kwitabuuja Nzambi. Nwamònu anyi? “Kulaaba mashi,” ku diitabuuja, “ne hizòpà.”

¹⁹ Mpindyewu, mukuukwidi, díbà adi, mumwènenà mwinshi mwa mashi aa, bìvwa bileeja ne yèyè ùvwa mwenzè dilòmbà dya Yehowah adi, ne ùvwa mufwànyikijìibwe. Cimanyinu cívwa cìleeja ne yèyè ùvwa mufwànyikijìibwe ne mwànà wa mukooko mushebeya uvwa Yehowah mulòmbè awu. Mudimu wùvwa mwenjìibwe. Cifwànyikijilu kaayi cipwàngàne leelu ewu’s wè, cya Kilisto ne mwena kwitabuuja. Padi Cimanyinu cìleejìibwa kùdi mwena kwitabuuja, díbà adi Cidi cìleeja ne nciitàbiibwe ne mudimu mmwenjìibwe.

²⁰ Díbà adi, mashi àvwa cimanyinu cya difwànyikijìibwa, mashi òwò miine. Nyama ùvwa muzànyike mashi, mufwè, ne mashi èndè àvwa ku cimanu. Mpindyewu, mwoyi wà nyama, wùvwa mu mashi awu. Ne mwoyi wùdi mu mashi, aci kaayi tudì bamanyè. Bible ngudi mwambè nanku, ne maalu a mamanya àdi àcìjaadika, mwoyi wùdi mu mashi. Ki bwa cinyi pàvwa nyama ùshebeyiibwa, ne mwoyi wùpàtuka mu nyama awu, mashi àvwa ne cya kwikala mashi a mwengùngù, bwa kwikalawù bu cimanyinu. Bwalu, mwoyi wùvwa mu mashi awu kawùvwa mwa kwalukila pa mwena kwitabuuja to, bwalu àvwa mmwoyi wà nyama.

²¹ Ne kakùyi mpatà to mwoyi wà nyama ne mwoyi wà muntu mmishiilàngàne. Kamwèna cintu nansha cìmwè to, nansha kakese. Wèwè mwàngàte, angàtà mashi a nyama ùdyélèshèwu, s’neùfwè. Pa nanku nudi numòna’s, twètù, mwoyi wùdi mu mashi a nyama mmu—mmushiilàngàne ne wùdi mu mashi a muntu, bwalu muntu ùdi ne musùkà. Nyama kèna ne musùkà to.

²² Nenku mpindyewu, ki bwa cinyi, mashi òwò miine, ikàlaayi bumvwè mpindyewu ne, mwengùngù mukùnze, mashi

a mwengùngù awu, bìvwa bikèngela kwikalawù ku ciibi, bu cimanyinu cya ne mwânà wa mukooko ùvwa mufwè, mpindyewu, bwalu mwoyi wà mwânà wa mukooko kawùvwa mwa kwalukila pa mukuukwidi muntu to. Kàdi leelu. . . Cìvwa anu cifwànyikijilu cyaànà.

²³ Leelu kí m'Mashi a mwengùngù a Mukalenge Yesu, Mwânà wa mukooko wetù awu to, kàdi m'Mwoyi wùvwà mu Mashi awu, wùdi Nyuma Mwímpè. Wòwò ngùdi wàlukila ne mwikàle Cimanyinu cya ne tudi biitàbe ne benzè amu menemene cidi Nzambi mutwàmbile bwa kwenza. Nenukù dîbà adi, patùdi ne Cimanyinu, tudi bafwànyikijìibwe ne Mulàmbù wètù. Menemene. Ncyènakù mèmè mmòna mùdi cikwabo cintu cifwànyine kutàmba kwambiibwa bitòòke to. Nwamònu anyì?

²⁴ Mushindu wùmwèpelè wùdiku muntu mufwànyine kumanya ne nzùbù awu ùvwa pèndè wa ku mikwabo ayi, mwinshì mwa mashi, mbwalu mashi a mwengùngù awu àvwa ku biibi. Bàvwa bàpita, bìvwa bikèngela bwa Mwanjelo wa lufù àtangilè ne àmonè mashi awu. Mpindyewu, kàbidì, cìvwa ncifwànyikijilu cya Nyuma Mwímpè.

²⁵ Mpindyewu, nwamònu's, Mashi meena-dìinà a Yesu kaàvwakù mafwànyine kulwa pa yònsò wa kutùdi to, bwalu Ùvwa anu ne Mashi bùngì bucincika mu mubidi Wèndè. Ne miine awu àkazòloloka, kupàtuka mu mubidi Wèndè, kubwela mu buloba, kùkaadi bidimu binunu bibidi; kàdi kí ng'awu àvwa àkèngelà bwa kwikalawù Cimanyinu to. Mwoyi, Mwoyi wùvwà mu Mashi awu, ki wùvwà Cimanyinu mpindyewu. Nènnùjaadikilèci, mu katanci kakese cyaànà, ku Bible. Cimanyinu ncidi ne cya kulwa pa yònsò wa kutùdi, bwa kuleeja ne tudi bafwànyikijìibwe ne Mulàmbù wètù, ne bakùmbàje dilòmbà dya Yehowah.

²⁶ Peetèlò wàkamba, mu Ditùkù dya Mpenta ne: "Nyingàlalaayi, yònsò wa kunùdi, nùbatijìibwè mu Dìnà dya Yesu Kilisto bwa dilekelediibwa dya mpekaatu, nenukù nenùpetè kupà kwa Nyuma Mwímpè. Bwalu mulayi wùdi kunùdi, ne kùdi bàna beenu balela, ne kùdi bònsò bàdi kule, mu bùngì bwònsò bwàbìikilàbo kùdi Mukalenge Nzambi wetù abu." Nwamònu's, kàyi ùleeja ne anu kùdìbo bòbò to. "Mu bùngì bwònsò bwàbìikilàbo kùdi Mukalenge abu."

²⁷ Kùdi bààbùngì bàdi bèèla meeji ne mbabiikidiibwe. Kàdi bònsò bàdi "Mukalenge" ùbìikila! "Aba bààkadyànjàlèYe kumanya, Wàkabàbìikila; bònsò bààkabìikilàYe, Wàkabàbingisha; bònsò bààkabingishàYe, mMubàtùmbishe," cintu ncimana kwenza.

²⁸ Kàdi dîbà adi paùdi wangata muntu udi kàyi wìtabuuja ne Nyuma Mwímpè ngwa ditùkù edi awu, udi umòna cidìye wènza anyì? Yèyè's ùdi ùvila Cimanyinu cidi cimfwànyì ciine cya ne wèwè udi mutwàngaja ne Mulàmbù wèbè aci. Nudi numòna

cîndi njinga kwamba aci anyi? Ncipeepèle bikolè bu nwênù anu mwa kucitàngila mu—mu mushindu wùdi Nzambi mucifündishe mpindyewu. Mashi mmatùsambwishe ne twêtù tuvwa . . . bìleēja ci—cimfwànyì cya Nyuma Mwîmpè, udi Mwoyi awu.

²⁹ Mpindyewu, mwoyi wà nyama kî mmufwànyine kwalukila mu muntu to, bwalu kî mmifwànyine kukùmbanangana to, mwoyi wà nyama kawèna ne musùùkà munda mwàwù to. Mwoyi wa muntu wùdi ne musùùkà. Nyama kî mmumanyè ne ùdi butakà to. Kî mmumanyè cidi cimpè ne cidi cibi to. Yèyè, ùdi anu . . . Yèyè ùdi ne nyu—nyuma, kàdi kèna ne musùùkà to. Mpindyewu vùlukàayi, mpindyewu ne, musùùkà nngiikàdilù wa nyuma, mu bushuwa bwa bwalu.

³⁰ Mpindyewu tàngilàayi, kàdi musangu awu Mwoyi wa Mulàmbù wètù, Yesu Kilisto, pàakeediibwà Mashi Èndè panshi . . . Yèyè ùvwa Nzambi, mukàngila mu Muntu umwèpelè. Mpindyewu, Yèyè wàkapweka panshi apa muumùke ku diikala Yehowah, bwa kuDìmanyisha bu muntu, bwa kwangata mmwènekelu wa muntu pa Yèyè mwine, bwa kutùfwanyikija Nendè. Yèyè ùvwa Mwànà wa mukooko wà Nzambi. Kàdi munda Mwèndè, mwine mùvwà Mashi . . .

³¹ Mpindyewu ndi mumanyè ne muntu kampàndà ùdi wàmba ne: “Yèyè’s ùvwa mashi a beena Yudà.” Nutu nuumvwa beena Yudà bàmba nanku awu. Kàvwa mashi a beena Yudà to, anyi Kàvwa mashi a bàà Bisàmbà bya bendè to. Yèyè ùvwa Mashi a Nzambi. Kàvwa ne ní ngàà mwena Yudà . . . Kàvwa ní mmwena Yudà ní ngwa bàà Bisàmbà bya bendè to. Ùvwa Nzambi. “Vi—vi—virgo neimìtè difù.”

³² Mpindyewu, ndi mumanyè ne bààbùngi bàà kunùdi ne beena Mishòònyì nutu nwela meeji ne diyi ùvwa dya Màriyà. Ne mashi miine—miine àdi àlwa awu, mwoyi wùdi wùbwela mu kabùlù kàà mashi. Bwalu, nzòòlo wa cikuka ùdi mwa kwela diyi, kàyi mupetàngàne ne citààlà to, diyi adi kàdyàkutooyika to, bwalu kadyèna ne bufukà to. Mwoyi wùdi wùfùma ku kasùlù kàà mashi, kàdi kàfùminà ku mubidi wà bulùme. Kàdi mu bwalu bùdi panshi apa ebu kakùvwa mubidi wà bulùme to, pa nanku, “mwoyi mu mashi,” wùvwa ne cya kufùmina kùdi Nzambi nkààyendè, nenku Yèyè wàkafùka kabùlù kàà Mashi munda mwa Màriyà. Nzambi Yèyè mwine, Mufùki Yèyè mwine, wàkafùka kabùlù kàà Mashi. Mpindyewu tàngilàayi. Bòbò bàdi bàmba ne: “Ee, cívwa mmubidi. Màriyà ùvwa ne diyi.” To, mukalenge. Kàvwa yèyè to; kàcívwa diyi to. Bu ne cívwa diyi, kwèna mwa kupeta bilùme kakùyi masansakata to. Nenku bu ne Yèyè, bu ne mukàji wàkapeta masansakata, nudi nufikisha Nzambi ku dyenza cinyi?

³³ Yèyè ngwàkafùka ne diyi ne Mashi. Ncyòcì aci menemene cívwaYe. “Twàkalenga Nzambi,” mùdi Bible mwambè. Timòtè wa Kumpàla 3.16: “Kakùyi dikòkangana to bwalu busokoka bwa

difwànà dya Nzambi mbunene: Nzambi wàkamwèneshiibwa mu mubidi. TwàkaMulenga ne byanza byetu ebi.” Mubidi awu wùvwa Nzambi. Cya bushuwa, mmwômò. Ùvwa Nzambi Yèyè yònsò, mu mmwènekeli wa muntu.

³⁴ Mpindyewu tudi tumòna mu cyôci eci ne, kabùlù kàà Mashì aku pààkataayikàku, aci cyàkalekelela Nzambi. “Nzambi ùvwa munda mwa Kilisto, ùpungisha bàà pa buloba ne Yèyè mwine.” Mwaba awu, mukwabo nansha umwe kàvwakù mwa kucyèenza to, cintu cikwabo nansha cìmwè kacìvwa mwa kwenjiibwa to; byàkakèngela Mashì a cijila awu, Yèyè mwine. Byàkakèngela bwa Nzambi àtuulukè ne àlwe muntu, bwa kukènga bwa mukenji Wèndè Sungasunga. Bu ne Yesu ùvwa anu mupròfètè cyanàànà, muntu mutàpùlùke ne Nzambi, dìbà adi Nzambi’s ùdi ne kànsungànsungà.

³⁵ Bu mèmè mwa kwamba ne: “Mwanèètù Grant àfwe bwa mpekaatu kampànda udi ukèngela bwa Billy kufwilayè,” anyì cintu cikwabo kampànda, cibawu kampànda, aci’s ncifwànyine kwikala kànsungànsungà. Mèmè mwambìle mwanàanyì wa balùme bwa àfwilè cibawu cìmvwà mèmè mwambè, kacyèna anu bwakàne to. Kùdi bwakàne anu bùmwèpelè bùndì mwa kwenza, nkwangata kaaba kèndè, pàngìikalà muswè kumusungila.

³⁶ Nenku bìvwa bikèngela bwa Nzambi àlwe mubidi, bwa kwangata mwaba wà ngènzàmpèkààtù; Nzambi mumwèneshiibwe mu mubidi, kàyikù mu kantu nansha kàmwè mushààdile kùdi Nzambi Yèyè mwine to. Mpindyewu, ki Yèyè ewu, munwèneshiibwe mu mubidi, bwa kuumusha mpekaatu ya bàà pa buloba. Ki kudìmanyisha Yè Yèyè mwine mu twètù, bwa twamòna mwa kumanyishiibwa mu Yèyè. Nudi numòna kiipàcilà kààci anyì?

³⁷ Mpindyewu tudi tujandula didifwànyikija dyetu ne Mulàmbù wètù, Mwoyi wà Mulàmbù awu mu twètù, wùdi Nyuma Mwimpè. Pààkataayikà kabùlù aku, kààkalekelela Nzambi, kààkalekelela Nzambi, nenku Yèyè wàkajidila cisàmbà ku Mashì Èndè Sungasunga ne kutèeka cyàkàbìdi Nzambi mu muntu. Nzambi munda mwebe, Mwoyi wà Cyendeleele!

³⁸ Ne mumanyi wa dibàla kanà yònsò wa cyena Ngelikà ewu mmumanyè ne mwakù awu, Mwoyi wà Cyendeleele, wùdi wùfùma ku mwakù ewu Z-o-e, Zoe, wùdi wùmvwijà ne “Mwoyi Sungasunga wà Nzambi.” Ncya bushuwa. Mushindu wùmwèpelè wùdiku mwa kupeta Mwoyi, kùdi mushindu anu wùmwèpelè wà Mwoyi wà Cyendeleele, m’Mwoyi wà Nzambi Sungasunga munda mwebe. Nwamònu anyì? Dìbà adi udi ne Mwoyi wà Cyendeleele, bwalu Yèyè ki ùmwèpelè wa Cyendeleele udikù. Ne twètù tudi byambiibwà bya meeji Èndè, kumpàlà kwa kwikalakù nansha difukà dya dyulu ne buloba anyì nì ncinyi cyònsò. Byònsò ebi bìdi anu meeji Èndè, ne twètù tudi dileeja dya patòokè dya meeji Èndè a civwàbi aci.

39 Nenku byàkakèngela bwa Àlwe panshì apa bwa kuumusha mpekaatu. Mukwabo nansha umwe kàvwa mwa kucyènza to. Kakùvwakù nansha umwe mukùmbànyine bwa kucyènza to. Nansha umwe kàvwakù mwa kucyènza to pa kuumusha Yèyè, ne Yèyè wàkacyènza.

40 Kàdi pashìishe, pààkalekelelediibwà Mwoyi awu kuumuka mu mubidi awu, Muntu, uvwa Mwânà wa Nzambi awu (Bukolè Bwèndè bufùki bwàkenza nzùbu, mùdi mwenji wa makùmi wa bya diibaka naabi kanà yònsò ewu, wàkiibaka nzùbu wàkabwelà Yemu, Yèyè mwine, Nzambi ngwàkenza nanku.), ne pashìishe, pààkangaciibwà mwoyi awu, Mashi awu, mwengùngù wàwù, mapòngolodiibwe panshì, anu mwàkapòngolodiibwà a Abèlè *mwakàne* awu panshì amu, kàdi ku Mashi awu nkwaàkafùmà Nyuma Mwîmpè wa Nzambi, ne Mwine awu ngwàkatùmiibwa kùdi bantu mu Ditùkù dya Mpenta, bwa kufwànyikijiibwa ne Mulàmbù wàkabàfwilà awu. Kakwènakù mukwabo mushindu pa buloba apa wutùdi mwa kucipeta to. Cimanyinu cilelèlè!

41 Tàngilàayi, byòbi ne wèwè uvwa ne dipiilà dya lufù, ne mumanyè ne nebàkushebèlè mu nkwasà wa nzembu, kàdi vùlukàayi ne, kubènga . . .

42 Dallas, tèèlejàayi! Kubènga Mashi a Yesu Kilisto, Cimanyinu cya Mashi Èndè, wèwè muCimòne kàdi kuCibènga, wèwè's neùkungamanganè ne Cilumbulwidi mwikàle ne Mashi Èndè mu byanza byebe. Wèwè ngènzàmpèkààtù, wèwè cidimba cya ekeleeziya, vùlukà aci.

43 Anji ambàayi tũng bu ne Lee Oswald ùvwa mukùmbàne, mu matùkù makese awu, ne mwikàle mufwè naayi kumpalà kwa Tubàdi Tunène twàkakùngamanganàye naatù atu; ne mumanyè, bwa dishebeya dya Mfùmù wa ditũnga adi ne, kakùvwakù mwa kwikala kaaluse nansha kakese, mushindu mwine wùvwà muntu awu mwa kwikala mudyùmvwè's wè! Nùnkù's ciywa bwalu bukolè be. Kààkafikakù ku dikùngamangana naaci to, bwalu mukwabo muntu awu wàkamwasa cingoma. Kàdi elàayiibi meeji bwa disòmba mwaba awu kumpalà kwa Tubàdi Tunène tũvwà ne ciji cikalè atu, mwikàle ne mashi a muntu neebe pa cyanza cyebe, Mfùmù wa ditũngà wa États-Unis! Aci's neciikalè cintu cya citùükije, bwenu nwènu bàdi bàpicilà ku luseke kwà Mashi a Yesu Kilisto abu, panwìmanà ku tubàdi twà Nzambi. S'nudi nufwa naayi panùdi numanya. Bùvwà naabù Oswald's bùvwà anu kuumuka mu mwoyi wà pànu ewu bwèndè yèyè, kàdi Nzambi Yèyè ùdi ùkuumusha Cyendeleele mu Bwikadi Bwèndè. S'neciikalè cintu cibi be. Mònaayi.

44 Bu ne bìvwa bikèngela bwa wèwè kupicila ku tubàdi, bwa dipiilà dyebe, uvwa mufwànyine kukèba mukwakwidi mutàmbe bwîmpè ùvwàku mwa kupeta awu. Muntu kanà yònsò ewu mmufwànyine kwenza nanku.

45 Ne muntu kanà yònsò udi mulela pa buloba apa ewu, nzùbù udiyè mupàtùkile nansha mwikàle mwímpè wa bishi, mmupile ku Mashi a Yesu Kilisto pàdìye kàyì mwitàbe difwidiibwa dya luse ku bwalu abu. Ne mushindu wùmwèpelè wùdiku umanya ne difwidiibwa dya luse adi ndya cya bushuwa, mpadi Cimanyinu Cyôci ciine cikutwìbwe, ne paùdi ne Cimanyinu aci.

46 Mònaayi, wèwè udi mupìile, ne udi mufwànyine kuya wenda ukèbangana ne mukulumbulwidi wa mutàmbe bwímpè ùdi mufwànyine kupeta bwa kulumbulula cilumbù cyebe. Ne bu ne mèmè mvwa mpicila ku Cilumbulwidi cya Nzambi, ncyèna muswè nsaserdose to, ncyèna muswè muntu nansha umwe to; ndi muswè mundumbulwidi wa mutàmbe bwímpè ùndi mwa kupeta bwa kulumbulula cilumbù cyànyi.

47 Lekèlà ngàmbè nùnkù, nkwambila wèwè, mulundà wanyì mwena Kilisto. Wetù mutùlumbulwidi ki wetù mulumbulwishi kabidi, ne mulumbulwishi wetù—wetù ngwàkalwa mutùlumbulwidi. Cilumbù ncidikòse patùdi tupeta ditùfwilà Dyèndè dya luse. Mulumbulwishi Yèyè mwine wàkalwa panshì apa ne wàkalwa mutùlumbulwidi, nenku mutùlumbulwidi ne mutùlumbulwishi bàdi Muntu umwe. Nzambi wàkalwa muntu, bwa Wàmòna mwa kubingisha muntu ku lufù Lwèndè Yèyè mwine lwàkatèèkàYe pa yèyè. Aleluuyah! Aci mbwena kwamba ne: “Butùmbì kùdi Nzambi wetù!” Yèyè ngudi mukùbànyine butùmbì bwònsò. Mutùlumbulwishi ne mutùlumbulwidi m’Muntu umwe.

48 Nyuma Mwímpè ùdi Cimanyinu cya ne tukàadi bafwidiibwe luse. Cilumbù nciètèeka ku luseke. Muntu yònsò mulùmè ne mukàji udi bulelèla mupetè dibàtiiza dya Nyuma Mwímpè, mmulumbulwishiibwe, mmufwànyikijiibwe ne mumulumbulwidi wèndè, ne mulumbulwishi wèndè, ne mulàmbù wèndè, ne Cimanyinu cidiye mukwàte bu cyèndè aci cidi cileeja ne lwendu lwèndè ndufucila too ne ku Butùmbi. Amen. Bwalu bwònsò mbujikè. Yèyè mmukwàte Cimanyinu aci. Ncyèndè yèyè, dibàtiiza dya Nyuma Mwímpè, didi bujaadiki bwa dibiiikà dya ku lufù dya Yesu. Amen. Nudi nuciitabuuja anyi? [Disangisha didi dyamba ne: “Amen.”—Muf.] Ki dimanyishiibwa dyebe ndyòdi adi, udi mukwàte Cimanyinu ku cyaanza.

49 Mpindyewu wèwè kùyì ne Cimanyinu aci to, kwàkubwela to. Udi ne cya kwikala ne Cimanyinu. Ki musinga mulòmba ngwòwò awu: “Pàngààmònà mashi, mashi ki cimanyinu aci. Pàngààmònà mashi, Nèmpicilè kumutù kwenu.” Udi ne cya kwikala ne Cimanyinu. Kùyì naaCì to, mòna’s, kwàkuyakù to. Bikèngela wikalè ne Cimanyinu.

50 Cimanyinu cyôci kaciyi cileejiibwe patòòke, cimanyinu kaciyi cileejiibwe kuntwaku to, cipungidi ciine kacivwa ne bukolè nansha. Wèwè udi wamba ne: “Ee, mpindyewu,

Mwanèètù Branham, mpindyewu anji indilà kakese.” Ncya bushuwa menemene.

⁵¹ Cimanyinu civwa kumutù kwa cipungidi. Bwalu Izaleela ùvwa ne cipungidi cya kutengudiibwa, ne mwena Yudà kanà yònsò ùvwa mwa kupàtuka ne kuleeja muntu kanà yònsò ne: “Ndi mwa kukujaadikila ne ndi mutengùdiibwe, ndi mwena Yudà, ndi mutengùdiibwe bilondèshile díyì ditùma dya Yehowah,” kàdì nansha nanku aci kacivwa cimwepula pàvwà cimanyinu kaciyikù kabidi to. Yèyè ùvwa ne cya kuleeja patòòke cimanyinu. Nudi nucyùmvwà anyi? [Disangisha didi dyamba ne: “Amen.”—Muf.] Yèyè. . . Bìvwa bikèngela bwa cimanyinu ciikalèku, nansha bishi. Wèwè mwikàle mu cipungidi. . . Mwena Yudà kanà yònsò ùvwa mufwànyine kwamba ne: “Ncyèna ndaaba mashi ku ciibi cyànyì to, ndi mwa kujaadika ne ndi mwena Yudà wa cipungidi,”awu Mwanjelo wa lufù ùvwa ùmupyà. Nansha yèyè ne lulamatu lwà bishi, nansha mwikàle cidimba cya ekeleeziya cya bishi, nansha ùfuta byàdiikùmì bùngì bishi, nansha yèyè wamba bishi mùvwàye mwitàbùùje Yehowah; Yehowah ùvwa mulòmbè cimanyinu aci.

⁵² Ne Yèyè ùdi ùcilòmba kabidi, ne leelu ewu. Bikèngela ciikalèku. Cìdì ne cya kwikalakù, “Bwalu kakwèna mungà njila mwinsi mwa Dyulu, díngà dína difila, mushindu nansha wùmwe,” nansha mwikàle mwimpè wa bishi, mwena lulamatu lwà bishi. Bidi bikèngela bwa Cimanyinu aci ciikalèku, ne cileejiiwbè patòòke.

⁵³ “Mashi,” mùdì wamba, “ee, s’ndi mushipè mwànà wa mukooko muèlè mu ciimùlàngì. Ndi muatèèke lwà paanyimà apa.” Aci kí ncivwàYe mwambè to. Ávwa ne cya kwikala pa mukamba wà ciibi ne pa ciibi. Bìvwa bikèngela kuleejiiwbawù patòòke.

⁵⁴ Ne bìdì bikèngela bwa nsòmbelu webè àleejè patòòke ne Cimanyinu cìdì munda mwebe. Kaa, nwènù beena Mpenta, mbwalu kaayì ebu neenù’s? Nsukì mibebula, kwìsù kulaaba bilaabu, bantù balùme, minèkù ya bundù ne bikwabo, mpenyì pàdìbì ne dileeja dya patòòke dya ne Mashi a Mukalenge wanyì Yesu Kilisto nCimanyinu cya Nyuma Mwimpè? Nwènù, biikàle ne cimwènekèlu cya difwànà dya Nzambi, ne nubiikila “mupongo” ne bikwabo byònsò, byenzi bya Nzambi ne, “mupongo.” Nudi nuleeja patòòke cimanyinu kampànda munyì?

⁵⁵ Bàdì bàmba ne: “Ndi mwena Mpent- . . .” Cyùdì nansha ciikàle cinyì. “Ndi Baptiste. Ndi Pres- . . .” Cyùdì nansha ciikàle cinyì. Bikèngela bwa Cimanyinu aci ciikalèku. Cyòcì ki cìdì Nzambi ùlòmba, ne kí ncikwabo cintu to anu aci.

⁵⁶ Wèwè udi wamba ne: “Ee, mèmè ndi ne dipòlomè dya bu-docteur.” wèwè ne Mápòlomè àudì naawù nansha òwò bùngì munyì. Cìdì Nzambi ùlòmba n’Cimanyinu aci, ne anu Cyòcì nkààyaaci. Kì cimanyishilu cya ne lwendu lwebe ndufucila. Yèyè

kààkwangata mikàndà yebe ya dijaadikiibwa naayi anyi cintu kampànda cikwabo to. Bìdi bikèngela Yèyè àpetè Cimonyinu aci.

57 Mwendeshi wa bis ùdi wàmba ne: “Mòna, anjì indilà kakese, aci kí ncìdi cimanyinu cyànyì to.”

58 Mwena ku ndèkè wàmba ne: “Ee, pàtukà kwàka anu mpindyewu.” Ticket ki cimanyinu. Upàtuka kwàka wambila mwendeshi wa ndèkè ne: “Mòna, ndi muswè kubànda mu ndèkè webè. Mushinga wùdi cinyì?”

“Ndà mwàmwa ùpetè cimanyinu cyebe.”

“Kaa, ndi nkufuta wèwè’s.”

59 “Mémè kî ngudi mwa kwangata mfrangà ayi to. Kwàkubànda mu ndèkè wanyì kùyi mufutè mushinga ne mupetè cimanyinu to. Cìndì mémè nkèba ncimonyinu aci.”

Wèwè udi wamba ne: “Ee, mémè’s ntu muyè ku tùlaasà. Ntu mwenzè *cikampànda*. Ntu . . .”

60 Cyùdi mwenzè nansha ciikàle cinyì, bikèngela wikalè ne Cimonyinu bwa cyanààna kwàkubàndamù to. Amen ne Amen. Kanwènaayikù mwa kucimòna anyi? Nzambi ùdi ùlòmba Cimonyinu aci. “PâNgààmòna mashì, nenku Nèmpicilè kumutù kwenu anu pâNgààmòna cimanyinu aci.”

61 Kacyi cileejjibwe patòòke to, cipungidi kacìwba nansha ne bukolè to. Kakùyi mpatà to mwena Yuda ùwba mufwànyine kwamba ne kujaadika yèyè mwine ne ùwba—ùwba mwena Yuda mutengùdìibwe, mwikalè mwa kupàtuka ne bânà baabo ne kwamba ne: “Tàngilàayi kùneeku, mémè’s ndi mutengùdìibwe.” Aci kacìwba ne civwàci cyùmvwija to.

62 Wèwè udi wamba ne: “Mémè ndi Méthodiste. Ndi Baptiste. Ndi mwena Mpenta. Ndi *cikampànda*. Ndi *cikansanga*.” Aci kaciyèna ne cidici cyùmvwija to.

63 Bikèngela wikalè ne Cimonyinu aci. Nenku pàdì Cimonyinu aci cìlwa, ki Cìdì cìfidilà Kilisto bujaadiki. Yèyè mmwambè ne ki cyènzàCi. Ne Kilisto ùdi Dìyi. Kàdi mmunyi mùdi mwa kuvila mùdi Bible mulelèlè, citùpà Cyèndè, ne kutùngunuka anu ne kwamba mùdi ne Cimonyinu, pàdìbi ne Cimonyinu ki bujadiki bwa Yesu Kilisto? Nwamònu’s, ki cìndì mémè ndìkonka’s.

64 “Kaa,” mùdi wamba, “ncyèna ngiitabuujà to, mémè ndi ngiitabuujà ne matùkù a bishimà. . .” Kaa, wadimuka, kakwèna Cimonyinu mwaba awu to. Cimonyinu cidi cìtwa “amen” ku Dìyi dyònsò, kantu ne kantu, bwalu Cyòci ciine ki Nzambi. Nwamònu anyi? Eyo.

65 Kàdi bu cimanyinu kaciyikù to, cipungidi kacìwba ne bukolè to. Cìwba cìvwijiibwa cyanààna. Mbya mwomùmwè mpindyewu! Byùdi wamba nansha byòbi bùngì—bùngì munyi, nansha wèwè mwambe ne: “Mémè ndi ngiitabuujà Dìyi dyònsò mu Bible,” wamba ne: “Mwanèètù Branham, ndi—ndi mwa kukutèèlela

cyàbìbìdì cya Bible awu, anyi Bible mujimà, ku mwoyi. Ndi muMwitàbùùje kantu ne kantu.” Abi mbìmpè. Sàtaanà pèndè’s mmwitàbùùje. Uh-huh. Bikèngela Cimanyinu!

66 “Ee, Mwanèètù Branham, mèmè’s ndi ne cimanu cijimà cilamika ne màpòlomè. Mèmè’s ndi Licencié, ne ndi ne dipòlomè dya bu-docteur, ne dya LLD. dya Latin. Kabidi, kaa, nkààdi mufunde mikàndà. Nkààdi mwenzè cikampànda. Nkààdi mwenzè bintu byònsò. S’nkààdi—s’nkààdi mwenzè bintu byònsò ebi.” Nansha nanku. Byònsò abi bidi anu bìmpè, kàdi nansha nanku bikèngela wikalè ne Cimanyinu. Cimanyinu, anu Cimanyinu ncicidì cilòmbiibwe!

67 Wèwè udi wamba ne: “Mèmè’s ndi mulongi wa Bible. Ndi—ndi muntu mwìmpè. Ndi *cikampànda*, *cikansanga*.” Abi bidi mwa kwikala anu bìmpè, byònsò abi mbìmpè, kàdi bìcidi bikèngela anu kwikala ne Cimanyinu!

68 Mpindyewu, lufù lùvwa pabwìpì ne kudikùma mu Èjjiipitù pa dìbà kanà dyònsò, ne lufù lùdi kabidi pabwìpì ne kudikùma mu ditunga edi pa dìbà kanà dyònsò.

69 Anna Jeanne, mèmè’s ndi ngumvwa cintu kampànda anu mùvwà papa webè, mwàkambàye diyì musangu kampànda. Ntu misangu yònsò anu munangè cyòci aci. Wàkamba ne: “Udi mumanyè’s, ditunga edi, ne mpekaatu anu yimwèyimwè ayi, Nzambi Yèyè mulekèle Amerike kàyi ùnyookiibwa bwa bidìye wènza ebi, bwa bidì bitàngila nsòmbelu mulenga Yèyè’s neikalè mwenzèjiiibwe bwa kujuula Sodomà ne Gomòlà ne kubàlòmba luse, bwa dibòòsha.” Acì’s ncya bushuwa.

70 Vùlukàayi ne, Izaleela wàkayooba bwa mpekaatu yònsò wàkenzayè, ne twètù peetu netùyoobè. Mmunyi mutùdi twenda tulwa ne madilekelela? Swika bikolè cingoma ku mikàbà! Alùkilà kùdi Nzambi, wèwè ekeleeziya! Ncyèna ngamba bintu ebi bwa kupanganangana to. Ndi nzwàmbila bu didimwija. Itàbùùjaayi!

71 Lufù lùvwa pabwìpì ne kudikùma. Nzambi ùkaavwa mubàleejè ngàsà Wendè ne luse Lwèndè, ku makolè ne bimanyinu ne maalu a kukèma (ki mùdiYè kabidi mwenzè leelu ewu kumpàlà kwa kupàtula Ekeleeziya), kàdi bòbò kabààkajinga anu kunyingalala ne kwitabuua mukenji to.

72 Nwamònu’s, kùvwa mukenji kumpàlà kwa kupàtula ekeleeziya. Bitu bikèngela nanku misangu yònsò. Mbya mwomùmwe mpindyewu. Bwalu bwònsò bwa nyuma bùdi bwènzekà ncimanyinu cya kùdi Nzambi. Nudi nwiitabuua nanku anyi? [Disangisha didì dyàmba ne: “Amen.”—Muf.] Bu mùdi Mukenji ewu, kùdi cimanyinu ne pashìishe Mukenji wùlonda cimanyinu aci. Nzambi wàkambila Mòsà, ne: “Bòbò kabàyi biitabùùje diyì dya cimanyinu cya kumpàla, pàmwàpa nebiitabuujè diyì dya cimanyinu ciibìdì.”

⁷³ Mpindyewu, panùdì numòna bimanyinu byènzeka, kàdì kakúyì mukenji kampàndà paanyimà pààbì to, ciikàle anu kàlaasà kàmwèkàmwè kàà tèlòlòjì kàà kale aku too ne ku ndekeelu, kacivwa cya kùdì Nzambi to. Kàdì mwaba wùdì cimanyinu kampànda cileejùbwe, Mukenji kampàndà wùdì wùcilonda. Mpindyewu tàngilààyaaku. Yesu wàkalwa mu cyalu. . .

⁷⁴ Ndi nnùpanda macì anyì? Anyì ewu yònsò udi ku cikòlokolo eci, cìdì cyùmvwika bu ne dīyì dīdì dyàlukila. Pàmwàpa diyì ndikolè ndambu. Ndi muswè bwa nùcyùmvwè.

⁷⁵ Pàkalwà Yesu mu cyalu, Yèyè kààkambilakù bantu maalu àbùngì menemene, bantu bònsò bàvwa baswè bwa kwikalaYè mu ekeleeziya wabò. “Kaa, Mupròfetà wa citende ewu, s’tudi anu ne disànka be bwa kwikalaYè neetu.” Úvwa wòndopa babèèdì. “Kaa, butùmbì kùdì Nzambi. Nzambi’s mmujuulè Muntu munene munkacì mwetu.” Bìvwa bilenga’s. Kàdì dīngà ditùku kufikabì mu mushindu wà. . .Aci civwà cimanyinu Cyèndè.

⁷⁶ Yeshààyì 35 wàkamba ne civwa mwa kwikala cimanyinu kampànda. “Balèmà bàvwa mwa kutùpika bu ngulungù,” ne bikwabo, “mpofo yivwa mwa kumòna.” Civwa ncimanyinu.

⁷⁷ Wàkaleeja patòòke cimanyinu Cyèndè bu Maasiyà, ne bikwabo. Kàdì bòbò, bààbùngì bàà kùdìbo, bààkamba ne: “Eyowa, mèmè ndi mufwànyine kwitaba aci.” Ee, mpindyewu, piikalàbì ne cyòcì aci civwa cimanyinu, bìvwa bìkèngela bwa kwikalakù diyì dya cyòcì cimanyinu aci. Dīyì divwà paanyimà pààcì divwa cinyi? PààkabangàYe kulongesha dilongesha Dyèndè ne kubàbìikila bu musùmbà wà nyòka mu mashinde apu. Kàcivwa munangùbwe to kubangila apu, nwamònu’s, pààkalwà diyì ne cimanyinu. Cimanyinu cyàkadyànjlila kulwa.

⁷⁸ Mòsà wàkaya mu Èjjiipitù ne cimanyinu. Ki kwelayè dikombo dyèndè panshì, dyòdì kwandamuka nyòka. Civwa ncimanyinu. Kàdì paanyimà pàà cikondo, diyì kushindikijadi cimanyinu aci. Dìbà adi kushìllanganabì. Nwamònu’s, bòbò kī mbaswè aci to. Dī—dīyì, dīdì ne cya kwikala, kulonda cimanyinu. Ne kacivwa cifwànyine kwikalakù cilwè pa dībà dikwabo nansha dimwè to anu adi, bwalu ndìbà dyàkakùmbana bwa Mifùndu kuulayì. Tàngilààyì cyàkamwambilàYe, mu kaacipuka kàà kàlakuka kapyà aku amu: “Ngàmònu mikèmù ya bantu Bàanyi ne ngáyùmvù, ne Ngàmònu ntàtù yabo kùdì babènzejì bàà midimu ku bukolè bàà Èjjiipitù, ne Ngävùluku mulayì Wànyì wùNgààkenzelà Abraham.” Bidimu nkàmà yinaayi byàkuula, ne Yèyè úvwa mwambìle Abraham ne bòbò nebùikalè muntwamu. Nwamònu’s, kacivwa mwa kwenzeka mu cikondo cikwabo to. Byàkakèngela bwa Mòsà kulwayè anu pa dyòdì dībà adi.

⁷⁹ Ntankù munene wa Nzambi ùdì útuta anu mu byòbì. Kààkupicisha kasunsa kàmwè anyì kushàadila ne kasunsa

kàmwè nansha. Neikalè anu pa dîbà jaaaja. Ee, pa nanku, nudi numòna's, byònsò bivwa byènda anu mu byòbi, kabiyikù mwa kulwa mu bikondo bikwabo to.

⁸⁰ Nansha bintu ebi pààbi kabivwa mwa kulwa mu bikwabo bikondo to. Eci kacivwa mwa kwikala cilwè mu matùkù a Luther to. Kacivwa mwa kwikala cilwè mu matùkù a Wesley to. Matùkù a ba-Baptistes anyi a ba-Méthodistes, mu àbò matùkù awu, kacivwa mwa kwikala cilwè to. Cidi ne cya kulwa mpindyewu. Bikèngela Izaleela ikalè ditunga. Bikèngela ekeleeziya yikalè mùdiyi mpindyewu emu. Bivwa bikèngela bwa kwikalakù mukenji mwisâtù, cikondo ciisâtù cya ekeleeziya. Bivwa bikèngela bwa kwikalakù Laòdikiyà. Kabivwa mwa kudyènza pàvwa Mpenta kàyi mulwè ne bwèndè bwalu butùuke, ne mupàtùke mudyènzè bulongolodi, ne benzè cidìbo benzè aci to. Dîbà adi bikèngela àlwe, pashishe Mukalenge ùlwa, pàdìbo bàMwela pambèlù pàà ekeleeziya apu. Yèyè ùdi Dìyi.

⁸¹ Bòbò bàdi ne bwòwà bwa kwela Dìyi adi kadyòmbò mwaba nansha wùmwè. Mbatungùnùke ne kushààla bapùwe bwa Dyòdi adi, kàdi biikàle anu bàkòkanganapù.

⁸² Mu Chicago, anu abidi àdi panshi aa, pàakampèeshà Mukalenge cikèènà-kumòna apu. Mwua ne bambi nkàmà yisatu kuntwaku. Mémè kwamba ne: “Mpindyewu ndi mumanyè cinùdi. . .” pa bìdi bitàngilà dimiinu dya nyòka, ne bikwabo, mémè ne, “umwe wa kunùdi àngatè Bible Wendè àlwe kwimana ku luseke lwànyì eku ne àjaadikè mudici cya mafi.” Musumbà wà mutàmbe kwikala wà matàmà bu byàtà wunùdi kanùyì banjì kuumvwa to. Mémè ne: “Nanku lekèlaayi kwikala kunjaanyina mu dikoshi.” Nwamònu's, ncyà pambèlù pàà ngeelèlù wabò bòbò wa meeji.

⁸³ Kàdi, bàdi bàmba ne: “Mwanèètù Branham mmprofètà pàdiye mulaabiibwe apu, kàdi pàdi dilaabiibwa adi dimuumuka, kaa, ncyèna mumanyè's.” Mbwalu kaayi. . .Aci cyòci kaciyi cimanyishilu cya mwena tèòlòji wa—wa—wa—wa mu cibwejakàji to! Ciine. . .

⁸⁴ Mwakù *muprofètà's* wùdi wùmvwija ne “mubuuludi wa Dìyi wa kùdi Nzambi.” Dìyi dya Mukalenge's didi dilwa kùdi baprofètà. Mushindu awu's ngwàkamanyishiibwà Yesu. Kàdi bàakamba paanyimà pàà dibikà dya ku lufù, bàakamba ne: “Twàmanyi ne Yèyè ùvwa muprofètà wa Nzambi,” nwamònu's, “muntu kàvwakù mufwànyineku kwenza bintu ebi Nzambi kàyi nendè to,” kàdi kabàyi baswè kwitabuuja mukenji Wèndè to. Kabàvwa baswè kwitaba Yone to, kàdi pèndè's ùvwa muprofètà. Kabàakaswà kwitaba Eliyà to, nansha umwe wa ku bakwabo bà kùdìbo abu, kàdi pààbò's bàvwa ne dibuulula dya kùdi Nzambi.

⁸⁵ Mwakù ewu, mwaku wà mu Anglais ewu, *muprofètà*, myakù ya mu Anglais yidi mwa kwamba cintu kanà cyònsò, wùdi wùmvwija ne “muyiishi.” Kàdi paùdi wamba ne *muprofètà*, wa

mu Bible wa kale awu, s'ùvwa wùmvwija ne “mwena lùmònò.” Ne yèndè mikàndà ya dimanyishiibwa naayi, yivwa, cìvwàye wàmba cìvwa cyènzeka, ne ki cìvwà cimanyinu cya ne yèyè ùvwa mupròfeta; yèyè aci cìvwa kabidi cimanyinu cya ne ùvwa ne dibuulula dya Diyì difùnda dya kùdi Nzambi. Ne dìbà adi pàvwà Nzambi ùcìshìndika, paanyimà pèndè, ùvwa ùcìjaadika.

⁸⁶ Bishi? Ee, bidi ne cya kwikala anu mushindu awu, kwàjiki. Kakwènakù mushindu wà kucicinguluka to. Nzambi mmwambè ne cìvwa mwa kwikala mushindu awu, nenku's ki bwalu abu. Kàdi's ki cyòci aci leelu ewu, nwamònu's, bikèngela bwa Cimanyinu aci cìikalèku, cìdi cimanyishà Diyì adi ne cìdivwija dìlèlèlà menemene. Pashìishe mwàkalayàYe, mwàkalongololàYe cisàmbà Cyèndè cijimà cya buloba bulaya aci, mpindyewu, pàvwàYe ne cya kwenzèja cimwangì aci, cìvwa ncìfwànyikijilu.

⁸⁷ Mpindyewu nènteetè bwa kujikija mu tusunsa tukwabo dikumi ne tutaanu, anyì makumi abidi, ne Diyìisha edi. Tèèlejàayi ne ntèmà mpindyewu, ndi muswè bwa nùmvwè cyòci eci, bwalu bidi mwa kwenzeka ne ncìyi mwa kunùmòkakù kabidi to, nwamònu's.

Mònaayi, mpindyewu tàngilàayi nùmonè mwàkalongololàYe cisàmbà Cyèndè.

⁸⁸ Mbanganyi bàdi bamanyè ne Yèyè kàtukù ùshintulula njila Yèndè? Kacya. [Disangisha dìdi dyàmba ne: “Amen.”—Muf.] Yèyè ùdi. . . mpindyewu tàngilàayi mu Bible nùmonè Yèyè ní ùkaadikù muyishintùlùle kacya. To, mukalenge.

⁸⁹ Yèyè wàkalongolola cisàmbà aci munyi? Dyàmbedi, Wàkanji kutùma mupròfeta ne cimanyinu, ùvwà m'Mòsà. Neya bushuwa anyi? [Disangisha dìdi dyàmba ne: “Amen.”—Muf.] Ne cimanyinu aci cìvwa ne mukenji kampànda, mukenji bwa “kudìlongolola,” bàvwa ne cya kupàtuka kuya ku buloba bùvwà bulayìibwe. Pashìishe Yèyè ùvwa ne dimanyishiibwa, dya mupròfeta ewu, dya ne Bukènkè bùvwà kumutù kwèndè. Dikunji dya Kapyà dyàkalonda mupròfeta ewu, aci tudi bamanyè, dyàkapìcila ne Mòsà mu cipèèlà. Tudi bamanyè aci. Ne pashìishe Yèyè kubàpèèsha cimanyinu bu ditwishìibwa bwa kabàyi mwa kuumvwa bwòwà, kwikala balùndùke ne babìndùlùke to; ki kwambaYe ne: “Pàngààmònà cimanyinu aci, Nèmpicilè kumutù kwènù.”

⁹⁰ Tàngilàayi mwàkenzàYe mpindyewu. Wàkanji kulongolola cimanyishilu, mùsànjeelà, mukenji mumanyisha, dimanyishiibwa dya mùsànjeelà, ne cimanyinu bwa ditwishìibwa dya ne njila mmumana kufuta. Bàdi mu lwendu batàngìle ku buloba bulaya.

⁹¹ Cintu cimwecimwe cìdìYe mwenzè leelu ewu! CìdìYe mwenzè ncinyi? M'Mutùtùmine Nyuma Mwìmpè. Nyuma Mwìmpè ki Mùsànjeelà, ne dimanyishiibwa dya mu Mifùndù dya Yèyè mwine dìdi dìMumanyisha munkacì mwetu, umwèumwè

awu makèlèlèlè, leelu, too ne kashidi. Ne Cimanyinu aci ki ditwishibwa. Citùdi tuumvwila bwôwà ki cinyi? Njila wetù mmumana kufuta ne twètù tudi bafwànyikijìibwe ne Mulàmbù wètù. Yèyè kèna mwa kukubèngela to. Yèyè ngudi mulayè nanku. Tudi bafwànyikijìibwe.

⁹² Izaleela ùpàtuka mu Èjjiipitù, mûngâmbi, ùdi mùdi—mùdi Mukàji-musèla ùpàtuka mu ekeleeziya. Pààkabangà Mòsà mudimu wèndè wà bwambi, Izaleela mujimà ùvwa mudikungwije pàmwè mu Goshènà, bwa disambila ne dikuukwila, menemene, bafùmine ku nseke yònsò ya Èjjiipitù. Ki mushindu wènà Mukàji-musèla, neàpatukilè mu Bùmwe, Bùbidi, Bùsàtù mwònsò amu, ne mu bya mishindu yònsò ayi. Neàpatukè. Ùdi ne cya kupàtuka. Mpindyewu twàbadi mu Ebèlù emu. . . Twètù mpindyewu, cintu cya kumpàla citùdi ne cya kwelela meeji, kulwa tufùmina mu bitùpà byònsò: “Kupàtuka munkaci mwa bupidyà.” Mpindyewu Nyuma Mwimpè mmulayè bwa kubìikila nanku mu matùkù a ndekeelu ne: “Pàtukàayi munkaci mwa beena bupidyà.” Mònaayi.

⁹³ Tudi tusangana mu Ebèlù 10.26, ùndi mufùnde kaaba aka ewu, ùdi wàmba nenku: “Twètù twenza mpekaatu ku bukòlè paanyimà pàà bamanè kupeta dimanya dya Bulelèlè, kakwèna kabidi mulàmbù bwa mpekaatu to,” nwamònu’s, paùdi ubènga kwitabuuja ku bukòlè.

⁹⁴ Mpindyewu bu nwènù mwa kumòna, cìndi mwa kwamba kaaba aka ncinyi, bu nwènù mwa kunshìlakù dìbà too ne pàngààfilà cifwànyikijilu aci. Ndi mufwànyine kudyùmvwa mu Nyuma ne, kî ncifikè bìmpè to. Nwamònu anyi? Mònaayi.

⁹⁵ Ki beena Ebèlù mbòbò aba, bàdi mu njila wabò wa dipàtuka. Nzambi kusungulaYè bantu dikumi ne babidi, anyi Mòsà ngwàkasungula, ku cyanza cya Nzambi, bwa kuyabò katentekela buloba abu; ki kwalukilabò, baalùkile ne cimanyinu cya buloba abu. Nenku pààkafikàbo mwaba awu, dikumi bàà kùdìbo bàvwa bakwàcike bwôwà bàmba kufwà. “Mòna’s,” mwàkambàbo, “beena Amàlèkà bàba, twètù’s tudi tumwèka anu bu tupasu kùdìbo.” Yoshùwà ne Kaalèbà bàvwa baalùkile, balwè ne cileeeji ne: “Tudi mwa kucyènza!”

⁹⁶ Nudi numòna’s, ki beena kwitabuuja bàà ku mikàlu mbòbò abu. Mbapicìle ku bintu bishìilèshìilàngàne ebi, ne ku ekeleeziya, ne ku dikashàlà dya ku bàà mu ekeleeziya, ne ku mabàtiiza ne bintu bya kwìsùkwìsù. Kàdi pàkaadìbi bìkafika ku disabuka bwa kupeta Cimanyinu, cileeeji cya ne Buloba bùdikù, cya ne Mwoyi. . . Yesu Kilisto kî mmufwè to. Aci’s ncipaapu cikwabo. Yèyè ùdimù ne mwoyi. Ùdi neetu, Ùdi mpindyewu munda mwetu. Pàkaadìbi bìkafika ku aci anyi, “ah,” kabàvwakù mwa kwitabuuja aci to. Aci cìvwa cibàpìte, nudi numòna’s. Nenku kwalukilabò, kàdi bòbò, muntu ne muntu, bààkafwila mu cipèlèlè, nansha umwe wa kùdìbo kàakaya dyàmwàmwa to.

Nenku, nudi numòna's, twètù tubènga kwitabuuja, twètù ba-Méthodistes, ba-Baptistes, ba-Presbytériens!

⁹⁷ Ndi ntèkemenà ne mulongeshi wanyì wa kale awu mmusòmbe kaaba aka leelu ewu. Docteur Roy E. Davis, bààbùngì bàà kunùdi mbamumanyè, ku Fort Worth eku mene, pàmwäpa mmusòmbe kaaba aka. Ndi mvùluka ne twákayiiikila pa maalu aa, kùkaadi bidimu byàbùngì, byàbùngì menemene. Yèyè ngwákambàtiiza mu diitabuuja, mu égise Baptiste Missionnaire.

⁹⁸ Nenku tàngilàayi, mwómò emu, mpindyewu, twètù... twètù—twètù bafikè ku mikàlu aku, twamba ne: “Ee, nenku butùmbi kùdi Nzambi, ndi mwakùle mu myakulu, aleluuyah.” Aci kí ncyôci nansha. Bu wêwè mwa kwamba, kubènga kwitabuuja kantu nansha kakese kàà Dìyì adi, kùdi cintu cipampàlà mùke mu dilabula dyebe. Wamònu anyì?

⁹⁹ Wêwè udi ufika too ne ku Buloba abu ne umòna ne bùdikù. Umòna ne Yesu mmubiike ku lufù. Yèyè ùdi munkaci mwetu. Udi umvwa Dìyì didi dilondà mukenji, kàdi kùyi anu uDiitabuuja to, udi mumanyè cidì cyènzekà? Dìbà adi bóbò's bààkafwila anu mu cipèlèlà amu mene. “Twètù twenza mpekaatu ku bukolè paanyimà pàà bamanè kupeta dimanya dya Bulelèlà, kakwèna kùshààla kabidi mulàmbù bwa mpekaatu to.” Ki cidì Mukàndà wà Ebèlù wùtwàmbila ncyôci aci.

¹⁰⁰ Kàdi mpindyewu tàngilàayi, patùdi tumòna bimanyinu binènè bya cikondo cya ndekeelu pa buloba apa, byàkalayàYe, mùdìbi bitàmba kutùdimwija ne cikondo cikaadi pabwìpi. Lekèlaayi kubènga kwitabuuja. Dìsangàayi. Bìvwa bìkèngela bwa twètù kwikala banangàngàne muntu ne mukwèndè ne biitàbùùje, ne batàpùlùke ne maalu a pa buloba.

¹⁰¹ Mònaayi, kabìvwa bìkèngela anu bwa bóbò kwikalabò bàsangila ne bàyiikila bwa bwalu bwa mukenji to. Bìvwa bìkèngela bwa bóbò kubwelamù, kuya mwinshì mwa mashi. Kì nkulwa kwamba ne: “Nudi bamanyè's, Mòsà's wàkatwàmbila. Mùsànjeelà awu, wàkamba, wàkatwàmbila ne bìvwa bìkèngela bwa twètù kwikala ne mashi. Nudi pèènù nwela meeji kaayi pa bwalu abu, balùmyàna?” Kacìvwa aci to. Shebèyà mwànà wa mukooko awu, ne laabà mashi kuulu aku!

¹⁰² Tudi mwa kulwa kusòmbe ne kupetangana ne Dìyì, ne bikwabo byònsò, kàdi katùyi ne Cimanyinu aci to, bidi ne dikwàcisha kaayi kutùdi? Nansha dikese. Bwelàayi mwinshì mwàCi. Yèyè kàvwa mwambùle bujitu bwa ewu yònsò uvwa kàyi mwinshì mwa mashi awu to. Ne Yèyè kí mmwambùle bujitu bwa ewu yònsò, leelu ewu, udi kàyi mwinshì mwa Cimanyinu aci to.

¹⁰³ Dìkù dijimà, dìvwa mu dikùbiibwa anu pàvwàbo mwinshì mwa cimanyinu aci, ne cimanyinu cìvwa cileejìbwe patòòke. Dìkù dijimà! Nudi nwitabuuja nanku anyì? [Disangisha didi

dyamba ne: “Amen.”—Muf.] Leelu ewu bivwa bikengela bwa twètù kuvùluka aci, balumyàna. Bàna bèètù balela!

104 Kàdi cikondo cya bunsongà cya lukutukutu ne bidündadünda, ne bintu bitüdi tupicila eci, ne bõnsò baaMüyàapàndì aba ne bìshiishi, nudikù bamanyè ne bõnsò abu mbaleejibwe mu Mukàndà emu anyì, wà Bible ewu? Mmùdici cyàmba mu Bwàkabuulwibwà. Cya bushuwa, mmùdici cyàmba. Mùdi bantu, bõbò, mùdibo—mùdibo . . . bõbò, bõbò, nwamònu’s, bõbò, kabàyi ne . . . S’mbafwè. Kabèèna mwa kubiika ku lufù to. Kabàvwakù bõbò bàà Cyendeleele to. Kabàvwakù mene mu Meeji awu to, pa nanku nebàbutukè. Bwàbò nebwikalè butùuke kashidi, babütüdiibwe anu kashidi kashidi. Nebanyookiibwè mukungùlu muleemùle, bwa byàkenzàbo abi, kàdi cyõnsò civwà ne ntwàdijilu cidi ne ndekeelu.

105 Cidi kaciyi ne ntwàdijilu aci, ki cidi kaciyi ne ndekeelu. Kùdi mushindu anu wùmwèpelè wà Mwoyi wà Cyendeleele. Mushindu wùmwèpelè wà Mwoyi wà Cyendeleele, s’ki wutüdi tudyenzejila ewu. Mõnaayi.

106 Yoshùwà, nshapità mwi2 wa Yoshùwà, ndumba wa bàà Bisàmbà bya bendè uvwa mwitàbùùje awu wàkumvwa, ne fàmiyè wendè, ne kulwayè naabò mwinshì mwa mwonjì mukünze, wùvwà cimanyinu cya kùdi baamisànjeelà bàà Yoshùwà abu. Mwanjelo mubütudyanganyi wa Nzambi awu wàkatwà cimanyinu aci mushinga, ne anu cyòci nkààyaaci, mu cimenga aci. Ki civwà dilòmbà dya Nzambi, kùdi basadidi Bèndè, cya ne Nzambi ùvwa mulòmbè cimanyinu eci, ne civwa anu cyòci cìmwèpelè aci. Nansha byòbi ne ùvwa mmulombodi wa cimenga, nansha byòbi ne ùvwa mmuntu mutàmbe bunsantu wa mu cimenga amu, nansha bõbò bayè mu ekeleeziya wa mutàmbe bunene wa mu cimenga amu, byõnsò mu cimenga aci byàkuupuka pa kuumusha anu nzùbu awu. Nzambi, nkààyendè, wàkatwà cimanyinu aci mushinga.

107 Mõnaayi, Yelèkò ùvwa muumvwe bàmba ne Nzambi ùvwa wènza bintu binène, kàdi kabàakatèya ntèmà ku didimwija adi to.

108 Ki mùdi bantu leelu ewu bùmvwà bidì Nzambi wènza munda mwa bidimu bikese bya ndekeelu ebi, kàdi kabàyi baswè kutèyakù ntèmà to. Bukolè ebu bunene bwa ngàsà ne bimanyinu, mwàkalayàYe ne, “Anu mwàkadibi mu matùkù a Sodomà, ki mwikalàbi kabidi.” Mushindu mwine wàkalayàYe ne cintu aci necyènzekè’s wè! Tàngilàayi cyàkenzekà mu Sodomà aci. Vùlukaayi ne, kuvwà cimanyinu cya Sodomà. Kàdi müsànjeelà, wa Maalàki 4 awu, ùdi ne cya “kwaluja myoyi ya bantu kùdi baataatù, baataatù bàà mpenta, kubàaluja ku Bible.” Kakwèna mwa kwikala Bible mukwabo, cintu cikwabo kampànda to. Eci ki dibuuludiibwa mu kaabujimà dya Nzambi.

109 Kàdi muntu kampàndà wàmba ne: “Ee, mèmè ndi ngiitabuujà *aka* katùpà, bwa Kàka ncyèna mumanyè to.”

110 Mùsànjeelà mulelèlè wa Nzambi ùdi ùkwaluja ku Cintu mu kaabujimà! Nwamònu anyi? Mònaayi, ki cidi Nyuma Mwímpè wènza ncyòci aci, ùkwaluja ku Dìyi ne Dìyi dyònsò dya Nzambi.

111 Ngàsà Wendè ùvwa muleejìbwe, cilumbulwidi Cyèndè cìvwa cìlonda. Bòbò's bàvwa ne cya kwikala biitàbùùje ne bàvwa mu dikùbiibwa mu bitanda byabo binène menemene bya cyena-màngumba bìvwàbo naabi mu Yelèkò amu abi, kàdi kusanganabò ne kabyàkakùmbana to.

112 Kùvwa ne cya kwikala bàmwè bàà ku...pàmwàpa babwelèmu mu mushindu kampànda, kùvwa nsongààlùmè yibidi mibwelèmu, ne bambè bwa kusangisha pàmwè mamiinu ònsò madyànjila-kulongolola awu. Ki mukàji awu kwangatayè...nenku kwangatayè nzùbù wèndè awu bu ekeleeziya, nenku kwakidilayè baamìsànjeelà abu; ne pashìishe kutèekayè bònsò bàà mu cimenga amu, bàvwà mwa kwitabuujà abu, mwinshì mwa cimanyinu aci.

113 Mukàji umwèpelè mu cibùcìlu cinène aci cyònsò! Mukàji mukese umwèpelè, ne mwine awu wa luumu lubì's, pàmwàpa mwipata kùdi ekeleeziya ne ekeleewiya yònsò mu cimenga aci, kàdi yèyè wàkiitabuujà mùsanjeelà awu. Nenku mùsànjeelà awu wàkashìya cimanyinu, cimanyishilu aci, ne Nzambi wàkatwa cimanyinu aci musinga. Ki mùdibi kabidi leelu ewu. Vùlukàayi anu ne pàakalwà, mubùtudyanganyi wa ciji cìkolè wa Nzambi awu, ndongolwelu munene awu wàkuupuka, cimanyinu aci cyàkalama nzùbu wa mukàji awu mu dikùbiibwa. Kacìvwa ne bwalu ùvwa mukàji mwímpè to; mbwalu ùvwa ne diitabuujà ne wàkatèeka cimanyinu aci.

114 Kàdi mpindyewu bu ne yèyè wàkamba ne: “Eyowa, bàvwa bantu balenga, ncyà bushuwa ne mukenji wáfìdìbo awu wùvwa munsànkishe, kàdi, bwa kwamba menemene, bìdi bimwèka bikùtākàne bwa kutèeka mwonji awu mulembelejila pambèlu ku dididiishì dyànyi, nèngùkòkèle anu munda.” Nùнку nzùbu awu's mmuupùke. Nùнку mmuupùke. Nzambi wàkatwà anu cimanyinu aci musinga, bya mwomùmwe anu mùvwà cimanyinu cya mwoyi mu Èjiipitù amu.

115 Yoshùwà ùvwa cìfwànyikijilu cya Yesu, bwalu *Yoshùwà* mbwena kwamba ne “Yehowah-musùngidi.” Ùvwa cìfwànyikijilu cya Yesu, ùvwa ne lulamatu ku cimanyishilu cya cimanyinu cìvwà mùsànjeelà wèndè muyiishè. Yoshùwà wàkashààla ne lulamatu ku cimanyishilu cya cimanyinu aci. Bònsò bàvwà mwinshì mwàci bààkasùngidiibwa, mu Èjiipitù. Bònsò bàvwà mwinshì mwàci bààkasùngidiibwa, mu Yelèkò.

116 Mashi a Mwànà wa mukooko ncìfwànyikijilu leelu ewu cya Cimanyinu, cya ne Nyuma Mwímpè n'Cimanyinu cya leelu. Bònsò bàdi mwinshì mwàCì bàdi mu dikùbiibwa. Bònsò

bàdi kabayi mwinshi mwàCì kabèèna mu dikùbiibwa to. Mu Ebèlù 13.10 ne 20, Yèyè ùdi ùbìkidiibwa ne “cipungidi cya kashidi.” Cipungidi cya kale cìvwa ncintu, eci n’Cipyacipyà, eci “ncipungidi cya kashidi.”

¹¹⁷ Nzambi, milayi ya Nzambi miswikila ku Mashì, yidi yitùsùlula ku mpekaatu ne ku bundù, ne yitùvwija bashiilàngàne ne bàà pa buloba bònsò. Kabyèna bikèngela bwa wikalè ne mvwàdilu mushiilàngàne to; muntu kanà yònsò ewu ùdi mwa kwikala ne mvwàdilu mushiilàngàne. Bikèngela, munda, wikalè mushiilàngàne. Mwoyi wùdi munda; kî mbilàmbà, divwàlà dya bilàmbà to. “Bukalenge bwa Nzambi kî mbyakudyà ne byakunwà, anyi divwàlà dya bilàmbà to; kàdi mmwoyi mule, bwîmpè, musàngelulu, lutùlù, mu Nyuma Mwîmpè.”

¹¹⁸ Mpindyewu, milayi yidi yisùlula ku mpekaatu, yileeya ne Nzambi kî—kî mmumanyè mpekaatu webè awu to. Davidi wàkamba ne: “Dyàkalenga ndya muntu udi Nzambi kàyi ùbadila mpekaatu to.” Ne Nzambi kàadyàkubadilakù mpekaatu pa Cimanyinu aci to, bwalu Cimanyinu ncimanyishilu cifuta cya ne Nzambi ùkaadi mucyàkìdile. Ne wèwè udi mucipetèle cimanyinu, mushing- . . . diitabuuja dyebe dyàcisumbu. Ne wèwè udi ne mushinga wà disumbà dya bupikudi bwebe mu mubidi wèbè, bwa kuMukuukwila ne kuleeya patòòke milayi ne bukolè Bwèndè.

¹¹⁹ *Dipungila Dipyadipyà* mbwena kwamba ne “cipungidi cipyacipyà.” *Mashì* àdi ùmvwija “Mwoyi.” *Dipungila Dipyadipyà* ndipungila dya Nyuma Mwîmpè, Nyuma Mwîmpè mwikalè ùfila bujaadiki bwa mùdi Yesu Kilisto mubiikile ku bafwè, buleejè ne Yesu mmutùkumbàjile dilòmba ne dilòmba dyònsò, ne ùdi ne mwoyi leelu. Cimanyinu cìdi cìjaadika ne Yèyè ùdi ne mwoyi bwa kuDifwànyikija neetu, bilondeshile mulayi Wèndè. Mpindyewu mmunyi mùdiku muntu mwa kubala Bible ne kumòna ne Yèyè mmucilayè, ne ùmòna Kilisto wàlukila mu matùkù a ndekeelu aa mu mmwènekulu wa Nyuma Mwîmpè ne ùDimanyisha ne ùdi ne mwoyi? Ki Cimanyinu ncyòci aci. Ki cimanyishilu ncyòci aci. Ki mushinga mufuta ngwòwò awu.

¹²⁰ Kwikadikù mweyèmène pa disaluka kampànda to. “Mvwa muumvwè mwongo mujimà mungenzè mashikà. Ne—ne mèmè—mèmè kuumvwa mupùuyà wà cintu kampànda; kumòna mashi mu byanza emu,” anyi maanyi. Anyi—anyi ne: “Ndi mupetè Dipòlomè dyànyì dya Licencié.” Anyi ne: “Ndi mujè maja mu Nyuma. Ndi mwelè mbilà. Ndi mwakùle mu myakulu.” Bintu abi mbifwànyine kwikala anu bîmpè. Ncyèna naabi cilumbù to, kàdi kî mbìndì mèmè ngamba nansha.

¹²¹ Mèmè ndi ngamba bwa dimanyishiibwa dya Cimanyinu, Yesu Kilisto, mubiike ku lufù ne mwikalè munda mwetu mpindyewu, ùDimanyisha, bwa kushindika cyàkàbidi Dìyi

Dyèndè dilaya dya ditùkù edi. Amen. Dìbà adi wèwè ne Kilisto nudi umwe. Nzambi ne Kilisto bàdi umwe. “Mu ditùkù adi, nenùmanyè ne Mémè ndi munda mwa Taatù, Taatù munda Mwànyì; Mémè munda mwenu, ne nwènù munda Mwànyì.” Ki Nzambi mumwènèshìbwe mu mubidi wà buntu nyawù, ùDileeja ne mwoyi, paanyimà pàà bidimu binunu bibidi. Ki Cimanyinu ncyôci aci.

¹²² Nwènù kanùyimù to, mùbwelàayi ne lukàsà lwónsò, nwènù balundà bàanyi. Dìbà ndifwànyine kwikala dipite kashidi. Katwèna bamanyè to.

¹²³ Kuleeja patòòke Bwikadi Bwèndè, Dipungila Dipyadìpyà, Mashi. Ne Ówò àdi ne mwoyi mpindyewu, miikàle ènza mashindika. Nenku bwalu Yèyè ùdikù, twètù tudi ne bukenji ku byònsò bìdìYe mutùpetèle. Muntu mulùme udi mupetè dibàtiiza dya Nyuma Mwímpè, anyì mukàjì udi mupetè dibàtiiza dya Nyuma Mwímpè, ùdi ne bukenji ku byònsò bìdì Yesu mutùpetèle, bwalu aci ki cimanyishilu citùdì naaci. Ki bukolè busùmbi mbwòbò abu.

¹²⁴ Twámbe cileejilu ne wèwè udi wamba ne: “Ee, Mwanètù Branham, cyùdì muswè kwamba ncinyi?”

¹²⁵ Mònaayi, ndi ncitòòkesha mpindyewu, ne ndi muswè bwa nwènù babèèdì nùmvwè eci. Tàngilàayi, mémè mfwà ne nzala, ne mumanyè ne mulungu wà dyâmpà, twámbe ne, wùdi wùyiila centimes makumi abidi ne yitaanu, ne kulwakù mwanètù wa balùme kampànda mwab’awu wàmba ne: “Centimes makumi abidi ne yitaanu nyôyi eyi, Mwanètù Branham. Wèwè nyawù ufwà ne nzala; angàtà centimes makumi abidi ne yitaanu eyi.” Mpindyewu, nudi bamanyè’s, s’ndi mwa kwikala ne disànka dya centimes makumi abidi ne yitaanu ayi mu cyanza anu mündi mwa kwikala naadi ne dyâmpà mu cyanza, bwalu ndi ne musinga wà disùmba naawù cintu aci. Ndi ne cimanyinu cidi cìsùmba dyâmpà. Ne pàdi dyâmpà mwaba awu mene; kàdi cintu cìmwèpelè, ndi mukwàte cimanyinu, centimes makumi abidi ne yitaanu yìdì yìsùmba dyâmpà, ndi mwa kwikala ne disànkà ne cimanyinu anu mündi mwa kwikala naadi ne dyâmpà.

¹²⁶ Mpindyewu, wèwè mupetè dibàtiiza dya Nyuma Mwímpè, ki Cimanyinu cya ne udi ne cintu cyònsò cya bupikudi cidi Yesu mufwile, ciikàle cyebe wèwè, cidi mu cyanza cyebe. Udi ne bwòwà bwa kucinana anyi?

¹²⁷ Mémè muyèlè mu mpaaya, ngamba ne: “Ee, ncyèna mumanyè ní ndi mwa kusùmba dyâmpà anyì ncyèna mwa kudisùmba,” s’nèmfwe ne nzala. Kàdi vùlukàayi ne, ngèndààmùshìngà awu ùdi wàmba ne: “Ndi ne dilòmbà òmwèpelè, Mukalenge Branham. Ne cìnjànjà cìmwè cya centimes makumi abidi ne yitaanu, udi mwa kupeta mulungu wà dyâmpà awu.” S’ndi naawù! Amen. Aci’s ncikòse bwalu.

128 Ki bwa cinyi katwèna tumòna bintu byàbùngi bitàmba kwenjiibwa leelu ewu to, Cimanyinu kî ncileejiibwe patòòke to, Cimanyinu cilelèlà. Kaa, tudi ne mishindu yònsò ya bya mafi, kàdi cîndi mèmè muswè kwamba n’Cimanyinu cilelèlà.

129 Tàngilàayi, dîbà adi patùdì tumanya ne tuleeja Cimanyinu, Mwoyi wùvwà wùkèngelà bwa Cimanyinu aci awu, Mashi ngàdì àtwàkwila. Vùlukàayi ne, Mashi a cipungidi àvwa àjinguludiibwa ku Cimanyinu, ne Dîyi ndidì dîtùshindikila bwa mulayi. Cimanyinu ncimanyishilu cya ne disùmba ndyenjiibwe bwetu twètù.

130 Mpindyewu, wêwè kùyi mwelamù to, ee, mu bushuwa bwa bwalu, kwàkupetakù cintu nansha cìmwè to; udi upìcila anu ku mulong wa bàbèèdì cyanàànà, upàtuka uya; uya ku cyoshelu, ne utàngila muulu, upàtuka uya.

131 Kàdi, kaa, mwanèètù, pàdì anu Cimanyinu citèèkiibwa munda mwa mwoyi wèbè—wèbè—wèbè, ne umanya ne cidi dibiiikà dya ku lufù dya Yesu Kilisto munda mwebe, cintu kampàndà’s cidi munkaci mwa kwenzeka. Kakwèna cintu ciikalà mwa kukukùdimuna to. Udi umanya ne udi wa mwaba kaayi. Ditùmikila mu kaabujimà ku Dîyi dya Nzambi dyònsò nkòong didi dikupèèsha bukenji bwa kupeta Cimanyinu, kî ncintu cikwabo nansha cìmwè to. “Wa dyàkalenga ng’ewu udi wenza Mikenji Yèndè yònsò, yèyè bwa wòlmòna mwa kupeta bukenji ku Muci wà Mwoyi.”

132 Dîbà adi, patùdì tusambila, tudi ne cya kwikala ne Cimanyinu cya kuleeja pàmwè ne masambila ètù. Mpindyewu kanùpangi kuumvwa aci to. Paùdì usambila, udi ne cya kwikala ne Cimanyinu cya kukwàcila pa disambila dyebe adi; bwa cyanàànà, tungunukà ne kusambila too ne pààlwà Cimanyinu, bwalu kwèna mupèèbwe mulayi wa kucipeta nansha. Nwamònu’s, bikèngela wǎnjì kwikala ne Cimanyinu eci; ki mushinga wà cisumbidi ngwòwò awu, diitabuuja dyebe bwa kuciitabuuja.

133 Mpindyewu, cimanyishilu cya ditùmikila mu kaabujimà. Bwòwà mbuyè. Pòlò udi ùtwàmbila ne: “Mashi àdi àkula àmba bintu bitàmbe bwîmpè.”

Wêwè udi wamba ne: “Mashi àkula?” Eyowa’s, Mashi’s àtu àkula.

134 Mu Genese 4.10, tudi tusangana ne Nzambi wàkamba ne—ne a Kaayinà. . . anyi ne: “Mashi a Abèlè àkaakula byùmukila pa buloba.” Tudi tusangana mu Ebèlù 12, ne: “Mashi a cipungidi a Kilisto àdi àkula àmba bintu bìmpè kutàmba a Abèlè.” Nwamònu anyi? Tudi tusangana ne, Mashi àdi àkula, Àdi àkula pa kaaba keebe. Mwoyi wùdì munda mwebe awu wùdì wàkwila ku Mashi meela panshì awu. Amen. Kaa, mwanèètù! S’mvw’a kujinga bwa muntu ne muntu wàmònakù cyòci aci. Nwamònu anyi? Bu nwènù mwa kumònakù cidici, cidi m’Mwoyi wùdì

munda mwebe. Nwamònu's, Mashi awu ngàdì àkufwànyikija naaCì. Àdì Cimanyinu. Kì...Cìdici, Mashi awu àkeediibwa panshì mbwebe wèwè; wèwè witàbi, ne Mwoyi wàbwedì munda mwebe. Wèwè udi ne Cimanyinu, ki Nyuma Mwímpè nyawu.

¹³⁵ Dìbà adi patùdì tusambila, tudi ne cya kwikala ne Cimanyinu cya kuleeja pàmwè ne masambila ètù, mûngàmbì amu, ne mpindyewu twitabuuja bwetu twètù biine ne tutèeka Cimanyinu bwa dîkù dijimà, mwàkadìbi mu Èjiipitù, ne mu Yelèkò, anyì nansha mu Byenzedi 16.31 amu. Tudi tusangana ne Pólò wàkambila kàmàndà kàà mäsàlaayi lukàmà kàà beena Loomò aku, wamba ne: "Itàbùjà wèwè, ne nzùbù webè mujimà neàsungidiibwè." Cìtèèkè bwa dîkù dyebe. Wèwè ne mwànà udi kàyi musungìdìibwe, tèeka Cimanyinu aci anu kuulu kwèndè mene aku, wamba ne: "Mukalenge Nzambi, ndi mmunana." Shààla wèwè anu mwaba awu. Wèwè ne maamù anyì munanga webè udi mujimine, tèeka Cimanyinu aci pa bôbò apu, wamba ne: "Mukalenge Nzambi, ndi ncìnana."

¹³⁶ Pàtulà, bùcyafù bwònsò bwa maalu a pa buloba abu, bùpàtulè mu nzùbù mwebe amu, ùdìlongòlòlè bwàCì. Oshà tùpùtulù twebe atu. Imànshà mèèsà èbè a dinàyila twarta awu anu kule. Tùùkakanà ne mfwankà yebe ayi. Imànshà bupidyà bwebe ne mabèji èbè a ekeleeziya awu mu ntuku wa bùcyafù, mùdì mubikùmbànyine. Amen. Dìbà adi udi udìlongolola. Pashìishe kwenza cinyi? Pashìishe kutèeka Cimanyinu mu disambila, ne cileeji cilelèlè, diitabuuja dilelèlè. Ù'Cìtèèkè, ùCìtèèkè ne dyeyemena. Paùdì utèeka Cimanyinu, manyà ne wàkezùdìibù. "Pìikalà myoyi yetu kayiyi yitùpiisha to, dìbà adi tudi tupeta dilòmbà dyetu."

¹³⁷ Panùdì nwénù anu munkaci mwa kwenza bintu bìdì bibì abi, mmunyi munwàlòmbà Nzambi bwa kunwenzela cintu kampànda panùdì bamanyè ne nudi bapùile? Kì bwa cinyi tudi anu tutànkakana tuya kumpàla ne tutànkakana tuya paanyimà. Ncyèna ngamba eci bwa kutàpangana ku mwoyi to. Ndi ngamba eci bwa kwolola, bwa kulongolola maalu. Mmunyi muwàciibakilà pa butù bwa Sodomà ne Gomòlà kampànda? Alùkilà!

¹³⁸ Nsangilu ne bambi's mbalekèle bantu bènza cintu kanà cyònsò, ne kabàyi banyookiibwa, ne bàfùndisha anu dìnà mu mbukù ne bàbàbiikila *cikampànda*, *cikansanga*, ne *cikankènga*, pààcì dipanga dya ngàsà. Ne bikaadi bikafikè mu mushindu wà ne diitabuuja dìdì cintu cìdì kaciyi nansha. . . kabàyi nansha ku mpùùkàpùùkà menemene kùdìbò nansha bàmanya cìdìdì mene. Bôbò, bàdi ne ditèkemena, kàdi kì ndiitabuuja nansha.

¹³⁹ Bikèngela wàlukilè, ku, kantu ne kantu kiikàle kakèbulula ne kakezula. Pashìishe wàngatè Cimanyinu cyebe, cyùdì mumanyè ne cìdì n'Yesu Kilisto munda mwebe aci, pashìishe ùCìtèèkè. Cintu kampànda cyòcì kaciyi cyezèke to, kùdì

katanyi; alùkìlâ cyàkàbìdì, udi ne cintu cya mafi mu cyanza cyebe amu. Yèyè mmucilayè. Yèyè nguvwa mucilayè. Û'Citèèkè. Balà Efèsò 2.12, musangu kampànda, wêwè—wêwè mujingè kucibala, nenku neùjandulè.

¹⁴⁰ Mònaayi kabidi, mu Ebèlù 9.11. Pòlò mmwambè ne: “Mwikàle nkwàcila Nzambi udi ne mwoyi mudimu, ne mèyi àdì ne mwoyi.” Ncyèna ncyàmba byenzè anu bu ne ndi mufwànyine kuya mùvwà mwena Ebèlù ne ciibidilu cya kwenza amu to, wàngata mulàmbù wèndè, kàdi kupweka ne njila, ne cimpàngà cinènè cya ngombe cya maanyi, ne kucitentekela byanza ne kudidwànyikija naaci, ne mwelè mashi panshi, wàlukila mubingishiibwe. Yehowah nguvwa mucilòmbe. Yèyè nguvwa mucyenzè. Pashiishe lukòngò lùvwà lùlondà, pàmwàpa bàvwà bàtàmba kulwa ne mashikà ndambù; muntu kampànda mukwabo, útàmba kulwa ne mashikà ndambù. Katanci aka, cilwa cilèlè cya dikù.

¹⁴¹ Ki cidì mpenta mulwè kutùdì ncyôci aci, cilèlè cya dikù. Tudi tutwà binù, twamba ne: “Dinàyà dya ku télévision dyàdya kadivwakù dimpè dilòòlò edi anyi? Ndi ndikonka cidìbo bakènzè mu ekeleeziya? Mukalenge Yesu, ondòpàku. . .” Kaa, luse wè! Nwamònu anyi? S'ncilèlè- . . . cya dikù. “Nudi bamanyè's, ndi mwakùle mu myakulu ditùkù adi. Ntu wa mu *cikampànda*, anyi *cinkansanga*, udi mumanyè's. Uh-huh.” Kaa, s'ncilèlè cya dikù.

¹⁴² Nudi bamanyè cyàkambà Nzambi anyi? Nzambi wàkamba ne: “Ngombe yenu ya maanyi ne bimpàngà bya mikooko abi bìdì binnunkila bibi mu dyùlù. Ncyà bushuwa, milàmbù yenu yikaadi mupùyyà mubolè.”

¹⁴³ Nenku ki mùkaadi kabidi milàmbù ya beena Mpenta, ne bilèlè ne mikòdi yetu ya cyena-màngumba ayi, ne bakàji ne balùmè beetu bènza mùdìbo bènza amu, cimwènekèlu cya difwàna dya Nzambi; bimba mijiki, ne muntu kampànda útùpika muulu wàlukila bwa katanci; ne byònsò byùmbe bijika, byenzè bu mbekeci wa màyi mupùmwinapù, pàdìbi byènzeka ne Dìyi dya Nzambi dipatukè ne dyàmbèku cintu kampànda. Ncilumbù kaayi aci's? Milàmbù yenu mmibange kununka bibi kumpàlà kwa Yehowah.

¹⁴⁴ Ne cìvwa ncikondo aci cyàkabwelà Yeshàayi mu cyalu, ne kubàmbilayè ne: “Nènnùpèèshè cimanyishilu cya kashidi, nsongàakàji virgo neimite difù.” Nwamònu's, s'ki bwalu abu. Kacyi bintu bifwè bya kwisùkwisù ne twitabàayi to, nansha; kàdi mèyi àdì ne mwoyi, Nzambi udi ne mwoyi udi mubiike ku bafwè, ne mwikàle ne mwoyi munkaci mwetu.

¹⁴⁵ Bàmwè bàà kùdìbo, ekeleeziya eyi mushindu awu, yidi yitabuujà bintu ebi ayi, bàdi bàbènga bàmba ne cintu pàaci ne n'Cimayinu kacitukù to. Ee, muntu kampànda wàkateeta kungambila ne: “Anu bapostolo dikumi ne babidi mbàakapetà Nyuma Mwimpè. Ki bònsò bàvwàku. Eyowa.” Kaa!

146 Kàdi twètù bàdi biitàbùùje Dìyì, tudi bamanyè bishiilàngàne, tudi bamanyè ne eci m’Bwikadi bùdi ne mwoyi. Bwalu mmunyi mutùdi bamanyè ne m’Bwikadi bùdi ne mwoyi bwa Kilisto, Nyuma udi munkaci mwetu ewu? S’Bùdi bwènza cintu anu cimwecimwe cyàkenzàYe aci. Ki cileeji cyàci. Mwonji wà mvinyò mmumanyikile ku mamuma àdiwu wùkwàma. Ne díbà adi piikalàbi ne mwonji wà mvinyò wà kumpàla awu wàkapàtuka ne kufùndabò Mukàndà wà Byenzedi paanyimà pàawù, ne cintu cimwecimwe cyàkenzà Yesu aci, bapostolo bacyènzè; díbà adi pàdi mwonji wà mvinyò awu wùpàtuka cyàkàbìdi, s’wùdi wènza cintu cimwecimwe aci. Nwamònu’s, Ebèlù 13.8 ùdi wàmba ne Yèyè ùdi umwèumwè awu, kaa, ekèlekèle, útùjaadikila ne Nzambi mmuMubiishe ku lufù bwetu twètù, bilondèshile Dìyì Dyèndè dilaya. [Katùpà kàà mukàbà wa mèyi munda mutupù—Muf.]

147 Citampì cya mulayi! Efèsò 4.30 ùdi wàmba ne: “Kanùbungamiji Nyuma Mwimpè wa Nzambi, unùdi batwibwe Nèndè citampì too ne ku ditùkù dya bupikudi bwenu.” Kí ntoo ne ku ditàbuluja didi dilondà to. “Too ne ku ditùkù dya bupikudi bwenu!” BabàtùjìbweMù, bilondèshile Kolintò wa Kumpàla 12. Ne munda Mwèndè mmùdi kaabujimà, ne mpekaatu nansha umwe kí mmumanya munda Mwèndè nansha. “Ewu udi mulela kùdi Nzambi kèna wènza mpekaatu to. Dimiinu dya Nzambi ndisòmbèle munda mwèndè, ne yèyè kèna mwa kwenza mpekaatu nansha.” Mmunyi mùdiye mwa kwenza, pàdi Cimanyinu kwòkò? Cimanyinu ncimanyishilu cya ne yèyè mmwitàbìbwe.

148 Nenku, ee, wèwè udi wamba ne: “Ntu ngenza mpekaatu.” Ee, nanku kacya kùtukù mwanji kupeta Cimanyinu aci to. Nwamònu anyi?

149 Cimanyinu’s mmukàlu, wùleeja ne musinga mmufuta. Sàtaanà yèyè muteetè kukupèèsha cintu...Anji elàku anu meeji. Sàtaanà yèyè ùteeta kukupèèsha bubèèdi kampanda, anyi ùteeta kukupèèsha cintu kampànda, udi mumanyè cya dyenza? Muleejè Cimanyinu cyebe aci. Cya bushuwa, bubèèdi bùdi bùkwàta mwena Kilisto. Muleejè Cimanyinu cyebe aci, ùmujaadikile ne wèwè udi cintu cisùmba cya Nzambi. “Kàndameenàayi dyabùlù, ne yèyè neàkunyaemè.” Shààla mukwàte Cimanyinu aci kuulu kwa diitabuuja dyebe didi kadiyi kunyungisha mu Dìyì Dyèndè dilaya adi.

150 Nzambi musangu kampànda wàkafila cimanyishilu cya mwanzankòngòlò bu cimanyinu. Nkàadi njikija. Wàkafila cimanyishilu cya mwanzankòngòlò bu cimanyinu. Ndi ne tusunsa anu bu dikumi cyanààna, bwa pashiishe ngènzè mulongo wà babèèdi. Yèyè wàkashààla misangu yònsò anu ne lulamatu ku cimanyinu aci. Mwòmò anyi? [Disangisha didi dyàmba ne: “Amen.”—Muf.] Úcidi anu mushààle naalù. Bidimu binunu byònsò ebi, kacya Yèyè musangu nansha wùmwe,

musangu nansha wùmwè, kàtukù mupangile kucileeja nansha. Wàkashààla ne lulamatu ku cimanyinu aci, cidi citùleeja ne Yèyè misangu yònsò. . . ne Yèyè kààdyàkupangilakù bwa kutwà bimanyinu Byèndè mushinga to. Nansha byòbì ne cidi. . .

151 Yesu Yèyè kàyi mulwè munda mwa bidimu binunu dikumi, wèwè udi ne Cimanyinu, bùdiYe Yèyè naabù mbwà kuCitwa mushinga. Nansha bintu bûngì kaayi bishintùlùke, ne binganyi bikwabo, bùdiYe Yèyè naabù mbwà kutwà Cimanyinu aci mushinga. Mmwambè ne ki cìvwàYe mwa kwenza. Eyo. Yèyè mmwindile bwa twètù kuleeja patòoke Cimanyinu Cyèndè aci, kuulu kwa diitabuuja dyetu ditùpèèsha kùdi Nzambi adi, kumpàlà kwa kasùmbù ne kasùmbù kònsò kàà beena bupidyà mu ditùngà edi ne pa buloba, bàdi kabayi biitabuuja ne bimanyinu ne maalu a kukèma bìdi bifila beena kwitabuuja abu. Nenku ikààlaayi ne lulamatu ku Cimanyinu eci, ne Cyòci ncidi cileeja ne mushinga wà lwendu mmumana kufuta ne twètù tudi biitabiibwe bwa dibiishiibwa dya ku lufù, biikàle ne Mwoyi wà Cimanyinu munda mwetu.

152 Aci's n'Diyiisha dya ditàpa's, kàdi m'Bulelèlà. Ki cidi citùkèngelà, m'Bulelèlà. Nzambi àtùkwàcishèku bwa kumanya Bulelèlà. "Nenùmanyè Bulelèlà, ne Bulelèlà nebùnùpèèshè budishikaminyi." Ndi njikula ngamba ne Yesu Kilisto ùdi umwèumwè awu makèèlèlà, leelu, too ne kashidi. Ndi ngiitabuuja ne Nzambi ùdi ùfila Nyuma Mwîmpè bu Cimanyinu, mpindyewu mene, pabwîpi menemene ne cimwangì, cya—cya Mukàji—musèla ùpàtuka mu ekeleeziya.

153 Ndi ngiitabuuja ne kùdi bintu bya budingidingi bûngì cyanàànà, ne bantu bàmba mùkaadìbo beelè mbilà, baakùle mu myakulu. Ntu ngiitabuuja bintu abi; kàdi kwèna mwa kweyemena abi to. Mmunyi mùdiku mwa kweyemena abi, kàdi pashiishe kuvila Dìyi? Nwamònu anyi?

154 Cimanyinu's n'Dìyi dimanyishiibwe munda mwebe, diikàle Dyòdi diine ne mwoyi wà wùpàtukila ne pambèlu. N'Nzambi mwikàle muDyùmvwijidi wa Yèyè mwine. Kabiyi bikèngela bwa wèwè kwamba ne: "Ee, mpindyewu, umvwijà mwakulu wànyi" to. Kì ng'aci to. Yèyè ùdi ùmvwijila nsòmbelu webè ku Dìyi. PàdiYe wàngata dîyi dyebe, cyùdi aci, ne ùmanyishila Dìyi Dyèndè mwòmò amu, kabyèna bikèngela dyumvwija nansha dikese to, cyòci cikaadikù. Nzambi ùdi ùDyènzela Yèyè mwine dyumvwija, ne twètù tudi bapetè milayi eyi bwa ditùku.

155 Kaa, Dallas, nwènù musùmbà mulenga wa beena Kilisto, kanwàngaciki ku nkwaka wa bintu ebi leelu ewu to, binùdi numòna byènzeka ebi, bwalu nebìbutukè. Ikàlaayi nunyùkusha Cimanyinu aci misangu yònsò, leejaayi patòoke Cimanyinu aci. Balàayi Bible. Fikàayi ku kantu ne kantu. Ne nyuma udi munda mwebe yèyè kàyi wàmba "amen" ku Cyòci aci to, dîbà adi's

mbipicìibwe ne wêwè mwalùkile, mushintùlùle cyûdi naaci aci, mwangâte Cimanyinu; kwèna naaCì to.

¹⁵⁶ Ndi mumanyè ne abi mbyàbûngì be bîngâmbì kaaba aka mu mapingaja àmwèpelè. Ne tudi mpindyewu mene dîbà inaayi ne tusunsa makumi asatu. Dîbà dyâkumbanyi mpindyewu, nenku bu twêtù mwa kupatukakù patwàmbà kufika pa dîbà itaanu bwa mulongo wà babèèdi.

¹⁵⁷ Nudi nwitabuuja ne Yesu Kilisto ùdi ne mwoyi ne ùdi ùkòokèsha leelu ewu anyi? [Disangisha didi dyamba ne: “Amen.”—Muf.] Nudi nwitabuuja ne bîngânwâmbidì abi m’Bulelèlè anyi? [“Amen.”] Ki Cimanyinu’s, dilòmba adi. Mémè ndi mwa kwamba anu cidi Bulelèlè. Ndi ngamba anu cîndi mmòna, cîndi ngumvwa, cidi cimbuulwila. Ne cîndi ngambidila cyôci eci, ku misangu binunu makumi kuvudija ku binunu, musangu nansha wùmwe kacitukù cyanji kupangila kwikala cilelèlè to, mpindyewu aci cidi ne cya kwikala Nzambi. Aci cidi ne cya kwikala Nzambi. Ee, Nzambi mmufwànyineku kufila mudimu wà bwambi wà mushindu awu kùdi muntu udi kâyi mumanyè cidie wamba anyi? [“To.”] M’Mufwànyine kuDimanyisha bu mwena lùmònò awu, ne pashiishe kukùdimuka kâdi kumupèèsha Dîyi ne cibwejàkâji anyi? [“To.”] Muntu udi uDîvila awu, yèyè ngudi mu cibwejàkâji. Ne Nzambi kâtu mu cibwejàkâji to. Nzambi mmuDyùmvwijidi wa Yèyè mwine.

¹⁵⁸ Petà Cimanyinu! Kwikadi mweyèmène diya kashààla wa mu ekeleeziya anyi bintu kampàndà bya kwisukwisù to, anyi nî ncinyi. Petà Cimanyinu! Ikàlâ muCìkwâte. Ki cintu cimwèpelè ciikalâ Nzambi mwa kwitaba. Pawâfikâ pa dîbà adi, pàâfika lufù lwebe, mbimpè wikalè mudikwâcile wèwè mwine Cimanyinu aci; mumanyè ne mu ditùkù dya dilwa Dyèndè adi, dibiiikâ dya ku lufù adi, ndi mwa kuleeja Cimanyinu aci. Kacyâkwikala mu mubid ewu to, wòwò mmumanè kubola; kâdi mu Nyuma ewu, udi kayi mwa kufwâku awu, cidi Mwoyi wà Cyendeleele, Cimanyinu cidi cishààdilamù. Ne Yèyè mmulayè ne: “Mémè nêmmujuulè cyàkàbìdi ku ditùkù dya ndekeelu.”

¹⁵⁹ Yesu Kilisto umwèumwè awu ùdi kaaba aka. Yèyè ngudi Mùsànjeelâ awu. Yèyè ùdi. . . Ki Mukenji *ngwewu*, ne Yèyè ki Mùsànjeelâ kaaba aka bwa kumanyisha Mukenji Wèndè. Mémè kî ngudi Mùsànjeelâ awu to. Yèyè ki Mùsànjeelâ awu, ne *Eci* ki Mukenji. Kâdi wèwè ne nyuma udi ubèngangana ne *Aci*, mmunyi mùdici mwa kwikala Mùsànjeelâ wa Mukenji awu? Anu Cimanyinu ncyàWùmanyishâ. Amen.

¹⁶⁰ Ngààvu kuumvwa bwena Nzambi bumbwelè. Ngùmuvù nanku cya bushuwa. Ndi ndyùmvwâ anu bu mufwànyine kubùuka kuya mpindyewu mene, bwalu ndi mumanyè Ùndi mwitâbùùje, ne ngàmònu nsòmbelu wanyi mufwànyikijùbwe Nèndè mu dibiiikâ Dyèndè dya ku lufù. Bwikadi Bwèndè bùdi

kaaba aka. Cítàbaayi, nwènù balunda bàanyi, cítàbaayi bu nwènù mwa kuswà, munda mwa mwoyi wènù amu.

¹⁶¹ Ndi mumanyè ne tutu tulwa bônso banyùngùlùkile cyoshelu bwa kusambila. Awu mmwèneni wa kale wa ba-Méthodistes. Kacya kabààkenzakù aci mu Bible to. Bible mmwambè ne: “Mu búngì bwónso bwàkiitabuujàbo abu bàakabàtijiibwa.” Ncyà bushuwa. Cintu pààci ne ndibiikila dya ku cyoshelu mu Bible kacitukù to. Aci ncintu citùdi twètù basàkidile, ciikàle anu cimpè. Cintu kanà cyónso cidi Nzambi ùbènesha, cidi anu cimpè.

¹⁶² Anu mùtùbo bèèla tulùlù twa kusambidila maanyi amu. Kacya kakùvwakù cintu bu nanku mu Bible to. “Bàvwa bùùmusha pa mubidi wà Pòlò mishwalà ne tulùlù.”

¹⁶³ Kàdi mushindu wónso wùdi muswè kucyèenza awu, bìdi anu bimpè, mu nkwasà webè amu, ku cyoshelu, kwónso kùdici aku. Cintu cimwèpelè, tèeka Cyôci aci, Cimanyinu pa wèwè. Dìbà adi ùdikenkètè, ùtangilè bwa kumòna ne nnsòmbelu wa mushindu kaayi udi wenza awu, ùmonè ní nCitèèkiibwe anyi to. PìikalàCi kaciyi citèèkiibwe to, dìbà adi cyónso cyùdiku naaci aci, citèèkè ku luseke, alùkilà, too ne pìikalà Cimanyinu citèèkiibwe.

¹⁶⁴ Tùsambilàayi. Taatù wa mu Dyulu, pàmwàpa ndi—ndi—ndi mwakùle muumishe maalu, kàdi, Mukalenge, musonso newùkwatè munyi wòwò kawùyi mupoopela bikolè? Nyewu ndòmba, Taatù, bwa wòwò kupoopediibwa bikolè mu myoyi ya bantu, bwa bààmónakù ne kî ncintu civwijùbwe cya mankendà mayè ne kwà nàka to. Kî nne ndi nteeta bwa kufwànyikija bulongolodi kampànda, cyòtà kampànda, kasùmbù kampànda, muntu kampànda, anyi mèmè mwine, anyi muntu mukwabo kampànda to. N'Yesu Kilisto. “Ndi ngeela malongolodi ònsò awu kaba kàmwè,” cidi mmanyi mu nkunde nkunde mu maanyi, bilondèshile Dìyi Dyebe. “Maamù ndumbà wa kale awu,” Bible mu Bwàkabuulwibwà 17, “ùvwa mamwèndè wa kònsò kàa ku tunkalandumbà atu.” Ne twòtò kî ntufwànyine kwikala balùme nansha. Ntunkalandumbà, ne twónso ntudyèlè mu bulàalu bwa ngiikàdilù ya maalu a pa buloba. Ne tudi tumòna ne ncidi cicyènzè, beena Mpenta ne bônso abu.

¹⁶⁵ Kàdi, Yesu, udi Wèwè ushààla anu Yesu. Bòbò kabàtèèlejìkù mukenji wà ekeleeziya kampànda to; kàdi anu Mukenji wà Kilisto, Dìyi. Swàku Wèwè ùDifwànyikijè, Mukalenge, leelu ewu, ne beena kwitabuujà. Ondòpàku babèèdi bônso. Fwàku luse ku mpekaatu yetu, Mukalenge. Ndi—ndi ndòmba, mèmè bu musadidi Webè, swàku ùmfwilè luse ku mpekaatu yànyi, ne ùfwilè bantu aba luse ku mpekaatu yabo. Ndi ne dyeyemena, Mukalenge. Yónso wa kùdibo kakuyi mpatà to mmukwàcishe mu milàmbù, bwa—bwa kufucila bitanda, ne mbatùùle mfrangà yabo, mbenzè—mbenzè—mbenzè byónso, Mukalenge. Éyi Nzambi, ndi ndòmba bwa kakwikadikù nansha

umwe wa kùdibo wâpangila to, Mukalenge. Swàku bwa muntu ne muntu àcipetè!

¹⁶⁶ Ndi—ndi ngenza nanku ne meeji matòòke, kàdi, Mukalenge, Wèwè udi ne cya kwikala muumishe mu dîsù. Tudi bamanyè ne, kulongolola ki dinanga. Dinanga ditu dilongolola bilèma. Nenku ki cîndi ndòmba. Bwalu ki ciWàkalongolwelà bantu Beebe, mbwalu Uvwa mubàngè, ne bikèngela bwa bàlumbululè bwa mpekaatu ne mpekaatu yònsò.

¹⁶⁷ Nenku, Taatù, ndi ndòmba bwa Ûfwekù luse ku mpekaatu yetu mpindyewu, patùdì tuyitonda apa. Tudi balalàkàne bayè kule be, Mukalenge. Mémè ndi mudifwànyikije ne beena Mpenta aba, Mukalenge. Ndi—ndi umwe wabò. Nenku ndi—ndi ndòmba, Nzambi, Ûtùfwilèku bònsò luse. Ne wàngatèku bàmwè bàà ku balombodi aba ùbàkùdimùne, ne—ne ùbàngijèku musangu wùmwe ku Kalvariyo kwàka, nenku dîbà adi nebàpwe mwoyi cìdì cìkèngelà kwikalabò aci, mukùlù anyi mwepiskopo, anyi ní ncinyi cyònsò cìdìci cìfwànyine kwikala aci, ne bàmanyè ne twètù katwèna banene mu Bukalenge ebu to. Tudi bònsò bàna bàà Nzambi. Ndi ndòmba bwa Ûtùkwàcìshèku mpindyewu. Dìmanyishèku Wèwè mwine munkaci mwetu, leelu. Tudi tulòmba mu Dinà dya Yesu Kilisto. Amen.

¹⁶⁸ Mpindyewu kumpalà kwa twètù kubanga mulongo wà babèèdì, nkufwànyine kwikala muntu mwab'ewu utu kacya kàyikù mwanji kulwa apa kwònsò eku to. Mémè ncyèna mumanyè ne wèwè udi nganyì to, kàdi Nzambi mmukumanyè. Piikalàbi ne ndi mwambè Bulelèlè, Nzambi àcimanyishèku, bwa ne m'Bulelèlè anyi kî mbwòbù, ki cileeji cyàcì ncyòcì aci. Piikalàbi ne Yèyè mmubiike ku bafwè, Yèyè ùdi umwèmwè awu makèlèlè, leelu, too ne kashidi. Yèyè mmwambè mu Yone 14.12 ne: "Ewu udi witabuujà," kàyi ewu udi udingidija kwitabuujà to. "Ewu udi uNgiitabuujà, byenzedi bìNdì ngenza yèyè neàbyènzè pèndè." Mmwómò anyi?

¹⁶⁹ Muntu kampànda ùvwa wàmba ne: "'Nenwènzè bitàmbe bunene.'" Aci ncyà bushuwa. Kwambayè ne: "Ee, s'tudi tuiyisha Evanjeeliyo, aci's ncitàmbe bunene."

¹⁷⁰ Anji enzàayi anu bintu byàkenzàYe Yèyè abi, ki byànjaadikilà mémè, nwamònu's, pashiishe netwàmbè bwa bidì bitàmbe bunene abi. Mémè ndi mwa kunùleeja bintu binènè bidìYe munkaci mwa kwenza mpindyewu bitàmbe byàkenzàYe pàvwàYe pa buloba apu, kabidi, kacýèna anu kuyiisha kwa Evanjeeliyo to; aci's mmu bimanyinu ne bishimà. Katwèna ne dîbà bwa aci to. Itàbùujaayi anu cyanàànà. Nenku Nzambi wa mu Dyulu, wàkabiiisha Yesu Kilisto ku bafwè, ne kuMuleeja pànwapa ne mwoyi awu, kutùdì, paanyimà pàà bidimu binunu bibidi, àmanyishèku Mukenji ewu ne, mMujaalàme. Bikèngela bwa Cìmanyinu citeekiibwè.

171 Mpindyewu, nwênù bàdì ne màsaamà ne ntàtu abu, sambilaayi, ambàayi anu ne meeji matòoke ònsò ne: “Mukalenge, ndi ngiitabuuja ne Wêwè udi ‘Mwakwidi Munene udi mwa kulengiibwa ku dyumvwa dya mateketa ètù.’ Ne nyewu bàtwàmbidì kùdì mwambi ewu ne, Wêwè udi neetu, mwikàle kaaba aka, dībà adi ndi muswèku bwa Wikalèpu neetu ne ùDimanyishè.” Sambilaayaaku mpindyewu, yònsò wa kunùdì.

172 Mpindyewu mbwalu bwa Nzambi bwa kwamba cintu kampànda. Cikondo kaayipu’s wè! Kaa, ekèlekèle! Ndi njingakù bwa ùmanyè cintu kampànda, mùdì udyùmvwà pàdì Cyòcì aci cilwa, buloba bujimà bùdì bùshààla lwebe wêwè. Amen. Démon nansha umwe kààkwenzakù cintu nansha cìmwè to, yêyè nkampànda mucìmùnyìibwe. Mukalenge wanyì mèmè ùdì kaaba aka. Byònsò bìdì mu byanza byetu. Amen.

Bu nwênù mwa kuswà ikàlaayi bapùwe. Kanùtambakanyi to. Sòmbaayi bapùwe.

173 Nwênù bàdì mu màkalù a balèma abu, ne bikwabo, kanwèdì meeji ne kanwèna ne pabwàsà to. Itàbùùjaayi. Wêwè—wêwè, ukààdì mubwelèbwèle mu milongo ya babèèdì, ne bakupangilèpàngile. Kí mmwambi uvwa mukusambidìle awu, uvwa mupangile to. Ndiitabuuja dyebe, ne udi mubangè kwela meeji ne kwàkwenza cintu to. Itàbùùjà.

174 Mònaayi, s’ki Bukènkè mbwòbù ebu kaaba aka, kumutù kwa inàbànzà wa bafìke udi musòmbe lwà paanyimà apa ewu, mwimàne ne byanza byela muulu mushindu ewu. Eyowa. Wêwè uvwa usambila. Eyowa. Udi witabuuja ne mèmè ndi mupròfetà Wendè, anyi musadidi Wendè anyi? Ncyèna ne cya kwamba aci to, bwalu citu cilèndwisha bantu bikolè. Wêwè udi ne . . . mulenga.

175 Muntu mulùme wa batòoke nyêyè ewu, muntu mukàjì wa bafìke, anu mwàkadibi bwa Mukalenge wetù ne mukàjì wa ku ciinà cya màyi awu, bisà bibidi bishìilàngàne. KubàleejaYè ne kakwèna dishìilangana dya bisà to. Meekala ètù kaèna ne cya dyanzamù to. Tudi bònsò . . . Tudi bafwànyine kupèeshangana muntu ne mukwèndè mashi a dyela mu mijilu. Nzambi wàkenza, ku mashi àmwè, matùnga ònsò.

176 Wêwè udi ne mutù wùkusaama, wùkusaama bya bibì. Pashìishe udi ne bujitu pa mwoyi wèbè, mbwà mwànà awu. Ne wêwè . . . Yèyè mmutàcishìibwe. [Mwanèètù wa bakàjì awu ùdì wàmba ne: “Amen.”—Muf.] Mwòmò menemene. Ncilelèlà anyi? [“Amen.”] Ncyà bushuwa.

177 Inàbànzà udi musòmbe pabwìpi neebe awu, mmumwèke bu udi mu dipetangana neebe, mmamwèbè. [Mwanèètù wa bakàjì awu ùdì wàmba ne: “Amen.”—Muf.] Ncyà bushuwa. [“Nzambi àtumbè!”] Ne yèyè ùdì ne cintu kampàndà cimusaama.

178 Udi ungiitabuuja anyi, inàbànzà? [Maamù awu ùdì wàmba ne: “Amen.”—Muf.] Udi ungiitabuuja anyi? Lutàtù lwebe nkusaama kùdì umvwà mu lubadi amu. Ncyà bushuwa. Lubadi

lwebe lwà dyàbalùme ndùdi lùkusaamà. Ncya bushuwa anyi? Ela cyanza muulu, ní ncyà bushuwa. Kacyàkukutàcisha kabidi to. Udi witabuuja bu Nzambi mwa kungambila ne wêwè udi nganyi anyi? Màmdamù Lowell. [“Amen.”] Ncyôci menemene. [“Amen.”] Eyo, kwàta njila ndààku, Mukalenge Yesu wàkupèeshi dilòmbà dyebe.

¹⁷⁹ Lwà ku ndekeelu kwàka nkusòmbe inàbànzà mukese mukwabo wa bafiike, ùtàngila, cyenzè anu—anu bu cya kumusùnsula’s. Mmutàngile buludi kùndi. Mmucitàbùùje. Aci, kanwènaayikù numòna Cintu cidì anu ku luseke lwèndè aku aci anyi? Udi ùsaama twonyi. Ncya bushuwa. Byònsò byàjikì mpindyewu; Yèyè wàkwondòpù. Amen.

¹⁸⁰ Bwa cinyi kanùyikù nwitabuuja? “Bu wêwè mwa kwitabuuja, bintu byònsò bìdi mwa kwenzeka.” Nudi nwitabuuja nanku anyi? [Disangisha didi dyàmba ne: “Amen.”—Muf.] Mònaayi apa...Tàngilàayi bantu bafiike! Dyenu diitabuuja didi penyì’s, nwènu batòoke?

¹⁸¹ Inàbànzà wa bafiike nyèyè ewu musòmbe kaaba aka mene, muntàngile buludi, inàbànzà mwenzè wa munene. Ùdi ne lutàtu mu cinù. Ùdi kabidi ne lutàtu, ùdi ne disaamà dya mwoyi. Eyowa. Ùdi kabidi ne butekète kampànda, dituuta dya mwoyi ne bintu bya mushindu awu, nangàngà paùdi uteeta kulàadila panshi, mweyelu wùpàta. Wamònu anyi? Ncikwenzèkèlè makèlèlè dilòlò. Vùlukà ne, ncyèna munkaci mwa kubala mu meeji èbè to, kàdi ndi mumanyè cyùvwà usambidila. Uvwa muswè bwa wabiikidiibwakù bwa cyôci eci, leelu, ne Yèyè wàkwandàmùnù. Mpindyewu kabidi udi ne lutàtu bwa kujuuka kuulu, bwalu udi ne binyòka. Aci ncyà bushuwa. Ne pashiishe, cingà cintu, udi ne disaamà dya cifù, didi ncyùjà munda mwa cifù amu. Aci ncilelèlè. Mpindyewu udi witabuuja ne ndi mupròfetà Wendè anyi? Mèmè, ndi ncyàmba anu dicyamba mwine. Itàbùùjà, nenku newòndopiibwè.

¹⁸² Kàdi bìshi bwa *dyebe* disaamà dya cifù adi? Wêwè pèèbè, udi witabuuja ne Nzambi neòndopè disaamà dyebe dya cifù adi, paùdi musòmbe mwaba awu apu anyi? Udi uciitabuuja anyi? Eyo, nenku udi mwa kupeta dyondopiibwa dya cifù cyebe adi. Amen.

¹⁸³ Udi muswè kulekela mfwankà anyi, wêwè awu, wêwè inàbànzà? Udi witabuuja ne Nzambi neàkulekèeshè dinwà dya mfwankà adi anyi? Udi muteetètèète kùkaadi ntàntà mule. Kabidi, udi ne disaamà dya cifù; udi muteetètèète bwa kulekela mfwankà. Ki cidì cikujuulà disaamà dya cifù adi. Udi muswè kulekela mfwankà awu anyi? Ndi nkubengelayè, mu Dìna dya Yesu Kilisto, bwa diitabuuja dyebe bwa kuMulenga.

Ndi nkwela kadyòmbò bwa wìtabuuje Nzambi!

¹⁸⁴ Ki mukàjì mukese nyèyè ewu musòmbe pààpa ùsambidila munanga wendè. . . mu lùpitaadi, ùpunga ne lufù, bwa kànsèrè.

Cya bushuwa. Ntatwèbè mukwabo. Neya bushuwa Wèwè udi anyi . . . Udi mukàji wa mwambi kampànda. Itàbùùjà ne mwoyi wèbè wònsò, muntu awu neòndopiibwè.

¹⁸⁵ Ndi nkwela kadyòmbò bwa wìtabuuje Nzambi! Ncinyi aci? Dimanyishiibwa, Yesu Kilisto awu. Wèwè udi wamba ne: “Kilisto ùdi cinyi?”

¹⁸⁶ Yèyè ùdi Dìyì. “Ku cibangidilu kwàkadì Dìyì, Dìyì dyàkadì ne Nzambi. Ne Dìyì dyakavwijiibwa mubidi ne dyàkasòmbela munkaci mwetu.” “Dìyì nditwè kutàmba mwelè wà nseke yibidi, dijinguludi dya meeji ne mapàngadika a mu mwoyi.” Kanwènaayikù numòna ne Dìyì ndilwè munkaci mwetu mu matùkù a ndekeelu anyi? N’Nyuma Mwímpè mwikàle wàngata Dìyì dya Nzambi ne ùmanyisha Yesu Kilisto, cìdì ciikàle Cimanyinu. Amen. Nudi nwitabuuja anyi? [Disangisha didi dyàmba ne: “Amen.”—Muf.]

¹⁸⁷ Mbanganyi bàdì ne twarta twa disambila? Bònsò bàdì *elu* luseke bàdì ne twarta twa disambila abu, biìmanyinè kuulu mu mulongo wùdì *apa* ewu. Juukilaayi anu kuulu cyanààna, bònsò bàdì lwàlwa luseke abu, anu lwàlwa luseke imànyinaayi apa mu kajila emu. To, anu mu kajila kàa ku dyàbalùme aka, bu nwènù mwa kuswà, mwaba awu mene. Baawisiyè, ndàayi ku myaba yenu. Pashiishe pàdìbo bàjikija, bakwabo bàjuukè kuulu, paanyimà pàà bòbò bamanè kujika, dìbà adi bikùdimukila ku lukwabo luseke. Mpindyewu bantu bònsò biikalè mu kaneemu.

¹⁸⁸ Nyuma Mwímpè wàngaci bukòntononyi bwa disangisha, pa nanku byàbùngi byàmbiibù ne byènjùbù bwa kujaadika. Mbanganyi bàdì biitabuuja ne Yèyè ùdi kaaba aka? Mbanganyi bàdì biitabuuja ne aci ki Cimanyinu? Mbanganyi bàdì biitabuuja ne n’Dìyì? [Disangisha didi dicyònkómoka—Muf.] Tangilàayi, mbanganyi bàdì bamanyè ne Mukàndà wà Ebèlù mmwambè, ne, “Dìyì dya Nzambi ditu dijingulula meeji àdì mu mwoyi?” Mbanganyi bàdì bamanyè nanku awu? Mbanganyi bàdì bamanyè ne ki bwa cinyi Yesu ùvwa mwa kujingulula meeji mu myoyi yabo, bwalu Yèyè ùvwa Dìyì? Mbanganyi bàdì biitabuuja nanku awu? Mbanganyi bàdì biitabuuja ne ki cìvwà kùdì bapròfètà? Kùdìbo nkùvwà Dìyì dilwa. Mpindyewu piikalàbi ne Dìyì didi dyàlukila kutùdì, KaDyàkwenza cintu cimwecimwe aci anyi? Dìbà adi mmunyi mùdì Dìyì didi dimanyishà Dìyì adi, mwa kupiila ku Dìyì? Kaa, luse wè! Ne kaneemu!

¹⁸⁹ Ê, inàbànza udi musòmbè apa ewu, ùdi pèndè ne cintu kampànda pa mwoyi wèndè. Mbyenzèke anu ne nkudimukè ki ngumba ncibàkula’s. Wèwè kwèna Màndamù Grant anyi? Kacya ncìvwakù mumanyè aci to. Kàdì wèwè udi Màndamù Grant, bwalu ndi nkumòna mwikàle naaci. Udi ne dibìnduluka didi dikutàcisha. Wèwè udi ne, mwanèèbè wa balùme ùdi ne cintu kampànda . . . mashi èndè, byenzè bu, àzòlòloka. Ndi nkwela

kadyòmbò bwa ùciitabuujà! Amen. Yèyè ùdi Mfùmù wa maalu àdi enzèkà. Yèyè ùdi Mfùmù wa lufù.

Tùsambilàayi.

¹⁹⁰ Mukalenge Yesu, pàcìdì Bwikadi Bwebe bùtùlaaba apa, mu citanda emu, ne twètù bamanyè bìmpè ne eci n'Nyuma Mwímpè, ndi ndòmba, Mukalenge, bwà Wòndopèku muntu yònsò udi uvwàla mìshwalà eyi.

¹⁹¹ Musangu kampànda, tudi bayiilè mu Bible ne, cisàmbà Cyebe, biikàle anu mu njila wa mudimu, bàvwà bàkòsolola Mbù Mukünze, kàdi mbù kubàcyàmàkànayè mu njila, mu njila batàngile ku buloba bulaya. Nzambi wàkapwekeshila mèsù mu Dikunji dya Kapyà adi, ne mèsù a ciji, ki mbù kukwàcikayè bwòwà, kudisàkayè paanyimà, ki Izaleela kutungunukayè too ne ku buloba bulaya, anu mu njila wa mudimu awu.

¹⁹² Éyi Mukalenge Nzambi, mèsù Èbè àtangidilèku mu Mashi a Yesu Kilisto, àpwekelèku mu Cimanyinu citùdì bakwàte kaaba aka eci kumutù kwa mìshwalà eyi leelu ewu. Nenku swàku bwa muntu yònsò wawwàla yòyi eyi awu, swàku bwa disaamà dikwacikè bwòwà, swàku bwa didisàkè paanyimà ne cisàmbà Cyebe cisabukè cìye ku mulayi wà mubidi tumatuma. “Disambila dya diitabuujà nedisingilè mubèèdì.” Mu Dìna dya Yesu Kilisto, biikalèku nanku. Amen.

¹⁹³ Mbayiishi kaayi ba-Méthodistes bàdi biitabuujà kaaba aka, bayiishi ba-Baptistes, bayiishi ba-Presbytériens, bayiishi ba-Baptistes, ba-Luthériens, anyi beena Mpenta?Mbanganyi bàà kunùdì bàdi biitabuujà Eci ne m'Bulelèlà? Nenku lwàyi apa nwìmanè ku luseke lwànyi eku patùdì tusambidila babèèdì apa. Bàndaayi kùneeku, nwènù bayiishi bònsò bàdi biitabuujà abu.

¹⁹⁴ Mbímpè, kì mmwòmò anyi? Mwanèètù Grant, mbímpè anyi? [Mwanèètù Grant ùdi wàmba ne: “Cya bushuwa's.”—Muf.] Uh-huh.

¹⁹⁵ Tùùlukilà mwab'ewu, wèwè mwanèètù. Mwanèètù Grant ùtu ne mudimu wà disambidila babèèdì. Muntu wa bukitù, muntu mwímpè, muntu utu Nzambi ùtèèlejila ne wàndamwina masambila, Mwanèètù Grant awu. Mèmè ndikù ne disànkà dya kumwela dibòko kunshìngù ne kwamba ciine aci, ne mwanèètù. Mpindyewu yèyè neàtuulukilè mwab'ewu bwa kusambila pàmwè naanyi.

¹⁹⁶ Panùdì nupìcila mu mulongo ewu, bìdi anu bu ne nudi nuvwila mwinshì mwa nkùrusè. Bàna bèètù, enzàayikù milongo yibidi mwab'ewu, mwab'ewu mene. Enzàayikù milongo yibidi; bàmwè lwà kùneeku, bàmwè lwà kwàka.

¹⁹⁷ Mwanèètù Roy Borders, udi kwèpi? Mwanèètù Roy Borders, mvwa mèmè ngeela meeji ne ùvwa kaaba aka's. [Muntu kampànda ùdi wàmba ne: “Neàlukilè katancì aka.”—Muf.]

198 Tàngilààyi kùneeku, kùdi bambi aba, è! Tàngilààyi kwàka nàka. Bìdi byènzakù ne ndyùmfwè bilenga's, bàna bèètù. Bambi bàà nkùruse, bantu bàdi biimàne kaaba aka bwa kudifwànyikija ne Mukenji. Cìdi mwa kwenzeka ncinyi?

199 Mpindyewu, tàngilàayi, mpindyewu kanùcyèyèkèdiku bambi nansha. Bòbò mbalwè bwa kudifwànyikija. Panùdi nupìcila mwómò emu, difwànyikijaay-...ikàlaayi bakwàte Cimanyinu kumpàlà kwenu ne: “Mukalenge Yesu, ngààtondù mpekaatu yànyì. Pèèbè, Wèwè wampèèshi dibàtiiza dya Nyuma Mwímpè. Mémè ndi cintu cisumba. Mpekaatu, bubèèdi anyì cintu nansha cìmwè kacyènakù mwa kundaminyina panshi to kubangila apa. Nyàya kumpàla anu bilenga.” Ikàlà mukwàte aci, kaa, kumpàlà kwebe, kàdi pìcìlà mwab'ewu, nenku Nzambi neàkwondòpè ne neùpatukè mwab'ewu wenda ucyònkòmoka, mwikàle ne disànka, ne bukolè bwa mubidi. Nudi nuciitabuuja anyi? [Disangisha didi dyàmba ne: “Amen.”—Muf.]

200 Mpindyewu muntu yònsò kaaba aka, twìnyikàayi mitu yetu, bàna bèètù, patùdi bònsò cyàpàmwè apa. Katwèna bamanyè ne cyènzekà ncingayi to. Katwèna anu bamanyè to. Kakwènakù kabìngilà nansha kàmwè bwa muntu nansha umwe kuumukayè mubèèdi mu citanda emu mu mapingaja emu nansha. Ikàlà mukwàte Cimanyinu aci mu mwoyi wèbè, pìcìlà wèwè anu buludi mu mulongo wà babèèdi ewu, mwikalà bambi, bàdi balàmbùle nsòmbeulu yabo ku—ku mudimu ewu, mwa kwimana kaaba aka, bànùtentekela byanza panwìkalà nupìcilamù apu.

Wèwè udi wamba ne: “Wenji nanku bwa cinyi, Mwanèètù Branham?”

201 Ndi muswè bwa nwènù, muntu ne muntu, nùmanyè ne anu...mémè ncyèna mwondopi nansha. Bantu aba bàdi ne bukenji bwa kusambidila babèèdi anu mùdi nì nganyì mukwabo yònsò. Bwa kwamba menemene, ndi mémè ngiitabuuja ne Nzambi mmufwànyine kwandamuna ku masambila àbò bòbò kumpàlà kwa Yèyè kwandamuna ku dyànyì. Mémè ndi mucyòke ne muzengèle, ne bikwabo byònsò. Ndi—ndi ngiitabuuja ne mMufwànyine kwandamuna ku masambila àbò. Nenu's mbòbò aba biimàne munkaci mwàci mene, bwa kudifwànyikijabò, kabàyi ne bundù bwa kwangata kaaba kààbò to. Mémè ndi ngaanyisha bantu bàà mushindu awu.

202 Mpindyewu, bàna bèètù, ndi mumanyè munùdi nudyùmfwà. Mémè ndi, ndi neenù cintu cìmwè. Ndi ewu udi mulukàkàje bukòndò bwànyì pàmwè ne bwenu, mu Texas emu, bwa kuteetakù kukwàta wùmfwè wà ku mishipa yìdi Nzambi mulongòlwèle Mwoyi awu, kunùdi aku. Mémè ndi ngenza ne mwànyì pàànyì mwònsò. Ndi neenu, lukàmà pa lukàmà. Mìngà misangu ndi ntàndisha ne ngeelela malongolodi ne bikwabo abi mbilà. Aci kì kwamba ne ndi mbèngangana neebe to, wèwè mwanèètù. Ndi muswè kwamba ne ndi mbèngangana

ne ndongolwelu udi mufwànyine kutùtàpulula ku diikala bânà bèètù awu, bwa dilongesha kampàndà dya butèndeledi. Tudi bânà bàà muntu ku dibàtiiza dya Nyuma Mwîmpè. Tudi bakwàte Cimanyinu anu cyôci cimwecimwe aci. Tudi bapetè Mashi anu ôwò amweamwe awu, pa nanku twitabuujàayi aci. Tudi mwa katwilanganaMù (kî mmwômò anyi?), bânà bèètù, yônsò wa kutùdi mwinshì mwa Mashi.

²⁰³ Mpindyewu, mêmè bakanjidila mu mudimu wà bwambi mu ba-Baptistes. Pàmwăpa wêwè udi Méthodiste, anyi Luthérien, anyi Presbytérien, mwena Mpenta, Unitaire, Binitaire, Trinitaire, anyi cyônsò cyûdi naaci aci, Église de Dieu, cyônsò cidiku aci. Aci kacýena ne cidici cishintulula to. Tudi mwa kubènga kupetangana pa tuntu twa tukese tukese atu, tûtùpwayi mwoyi dîbà adi.

²⁰⁴ Cintu citùdi mwa kupeletanganapù, ncya ne Yesu Kilisto Musùngidi wetù mmufwè bwa mpekaatu yetu, mubiike ku lufù ne mutùpèeshe Cimanyinu. Tudi biimàne kaaba aka ne masambila ètù, a kukwàta kumutù kwa bânà bèètù bàà balùme ne bàà bakàji babèedi bàdi bàpicilà mu mulongo ewu aba. Nèngiikalè mwa kuciitabuuja ne mwoyi wànyì wônsò.

²⁰⁵ Ngămònu cintu kampàndà cyènzeka dîbà adi mene. Amen. Ndi mumanyè ne nudi nwela meeji ne ndi mupâle, kàdi ndi ndyùmvwà bîmpè mu dipaala amu. Ndi anu ntékemena ne ndi mwa kushààla mushindu ewu. Eyowa's, mukalenge. Mushindu ewu ndi ndyùmvwà anu bilenga bya dikèma.

Tùsambilàayi.

²⁰⁶ Mukalenge Yesu, nyewu nguumuka pa cibùmbà cya ku cyambilu eci, ntùlukila panshi apa, bwa kudifwànyikija ne bânà bèètù aba. Ndi ndifwànyikija naabo, patùdi bônso bakwàte Bimanyinu byetu mu byanza byetu apa, ne mu myoyi yetu. Patùdi tutùmikila diyi Dyebe ditùma apa, dya “kutentekela babèedi byanza, ne babèedi nebàsangalè” adi. Swàku bwa muntu yônsò udi upicila kaaba aka awu, àleejè Cimanyinu cyèndè ne, mmupetè Nyuma Mwîmpè, ne mmwànà wa Nzambi mulediibwe cyàkàbidi, ne mmucitàbùuje ne mwoyi wèndè wônsò. Ne pàdibo bàpicilamù apu, swàku bwa bèlè disaamà adi ne lutàtù lwà mubidi wàbò alu mulawu. Ne swàku bwa bàpatùke mwab'ewu bènda bàcyònkómoka, bamanyè ne diitabuuja dyabo ndidi dibòndòpe.

²⁰⁷ Nenku, Mukalenge Nzambi, mutùvwà, mu Dipungila Dikùlukulu, tutenteka byanza byetu pa mulàmbù, bwa kudifwànyikija ne mulàmbù awu, nyewu tutenteka byanza byetu pa Yesu bwa kudifwànyikija Nèndè. Yèyè mmutentèke Byèndè byanza mpindyewu pa twètù mu mudimu wà bwambi, ùDifwànyikija neetu, ku bimanyinu ne maalu a kukèma. Nenku tudi tutentekela babèedi byanza, bwa kudifwànyikija naabò, biikàle ne diitabuuja dyetu diswikàngàne ne dyabo. Bubèedi

bùdi ne cya kuya, ne swàku bwa bùye mu Dìna dya Yesu Kilisto, patùdi tutùluka panshi kaaba aka bwa kucipeta apa.

Disangisha dijimà disambilè.

208 Roy anyi muntu kampànda àlwe kùneeku imanè ku cikòkolo eci, bwa àlamè milongo eyi milulàme.

209 Tàngilàayi, panùdi nupicila kaaba aka mpindyewu apu, nùlwaayi biitàbùùje, nùlwe biikàle nusambila. Twètù netùtentekelè anu babèèdi byanza cyanàana. Nùpicilàayimù buludi. Sambilaayi. Panùdi nupicila mu mulongo wà bambi aba apu, piikalàbi ne wèwè udi wendela ku milonda ya balèma, yitèèkè panshi ùye. Piikalàbi ne uvwa ne kànsèrè, bubèèdi, ambà ne: “Ngàngàbukà wénjì cyònsò cidiye pèndè mwa kwenza aci, wénjì cyònsò ciwàye pèndè mwa kwenza aci, ne wàmbi ne nèngiikalè ne cya kufwà. Mémè ncyàkufwà to. S’ki Cimanyinu cyànyì ncyòlì eci, Mukalenge. Wèwè utu mundayè bidimu makumi mwandamutekète. Nyewu mpicila kaaba aka, ncyènza.” Nwamònu’s, enzàayi nanku. Nenùcyènzè anyi? [Disangisha didi dyàmba ne: “Amen.”—Muf.] Mu Dìna dya Yesu, swàku bwa biikalè nanku. Amen.

210 Eyo, picishàayi mulongo awu too ne ku ndekeelu. [Mwanèètù Branham ne bambi bàdi bàsambidila babèèdi, pàdi mwanèètù kampànda ùlombola disangisha mu musambu wà *Itàbùùjà Nàka* ne mikwabo misambu. Katùpà kàà mukàbà wà mèyi munda mutupù—Muf.]

Ndi ngiitabuuja!

Mpatà yànyì yònsò mmijiikiibwe mu Mpokolo.

211 Nudi nuciitabuuja anyi? [Disangisha didi dyàmba ne: “Amen.”—Muf.] Amen. Kaa, Yèyè kì ngwa ùkèmesha anyi? [“Amen.”] Bàmwè bàà kùdibo bàvwa mu tulàalù twa dibùnya ne twa dyambwila babèèdi twàtwa, mbajuukè buludi baasè lwendu bayè; batùshiye anu tutèeka mwaba awu, kàdi bàshi lwendu bàayi. Kaa, bantu bònsò mbafwànyine kwondopiibwa mpindyewu, bàaciitabuuja abu. Nudi nwitabuuja anyi? [“Amen.”]

212 Anjì tùpèèshèku cyonà tǔng, *Ndi muMunangè*, è, mwanèètù wa bakàji; musambu wà kale wà ne, “Ndi muMunangè, ndi muMunangè bwalu . . .”? Tùbandishàayi bònsò anu mèyi ètù, ne byanza byetu, myoyi yetu, kùdi Nzambi, ne twìmbàayi ne: “Ndi muMunangè, ndi muMunangè, bwalu Yèyè wàkannanga kumpàla.” Bantu bònsò mpindyewu.

Ndi muMunangè, ndi muMunangè

Bwalu Yèyè wàkannanga kumpàla

Ne wàkampetela lupàndu

Ku mucì wà Kalv- . . .

213 Inàbànzà kampànda, mujuukè mu dikalù dya balèma, wèndakana eku ne eku mwab’ewu mukwàcisha kùdi bantu

babidi. “Ndi . . .” Tùnyungishàayi byanza byetu kùdì Nzambi ne: “Ndi muMunangè!”

Ndi muMunangè
Bwalu Yèyè wàkannanga kumpàla
Ne wàkampetela lupàndu
Ku . . . wà Kàlvariyo.

TùMutùmbìshaayi anu cyanàànà mpindyewu, bantu bònso!

²¹⁴ Butùmbi kùdì Nzambi! Mushindu mwine wutùdì tuKusàkidila’s wè, Mukalenge Yesu, bwa bwímpè Bwebe, Bwikadi Bwebe. Kaa, tudi tuKusàkidila bwa Cimanyinu, Mukalenge. Tudi basungidìbwe ne buujiibwe tètè ne Nyuma, Nyuma Mwímpè ùpaasalala mu mibidi yetu mpindyewu. Mushindu mwine wutùdì tuKusàkidila’s bwa ciine eci, Taatù! Kaa, mu Dìnà dya Yesu mmutùdì tuKusàkidila emu. Amen. Amen.

²¹⁵ Bantu bònso bàlabulanganè ku byanza, bàmbe ne: “Butùmbi kùdì Mukalenge!” Labùlàngànaayi ku cyanza, nwamba ne: “Butùmbi kùdì Mukalenge! Butùmbi kùdì Mukalenge!” (. . . ? . . .) Eyo, mpindyewu, bònso cyàpàmwè cyàkàbìdì.

Ndi muMunangè, (byanza muulu, myoyi kuulu)
Ndi . . . (cijìkùlè cyùmukila anu mu mwoyi wèbè)
Bwalu Yèyè wàkannanga kumpàla (Wèwè ngwàtangalajangana anyì?)
Ne wàkampetela lupàndu
Ku mucì wà Kàlvariyo.

²¹⁶ Mpindyewu twìnyikàayi mitù yetu mu kaneemu kàà menemene, pàndì nshiila mpindyewu Mwanèètù Grant bulombodi bwa disangisha bwa kutangalajangana apa; mwikàle ngeela yònsò wa kunùdì twasàkidila. Dyànbedi, ngeelakù Mukalenge twasàkidila bwa bwímpè Bwèndè, luse Lwèndè, ne ditwishibwa dindì ntèkemenà ne tudi bashiye mu mwoyi wèbè, dya ne katwèna nkààyeetù kaaba aka to. Kàpìteenà wetù Munene ùdì munkacì mwetu. Lubilà lwà Mfùmù lùdì mu citùùdilu. Nenku tudi twela Mukalenge twasàkidila, bwa kumòna bukolè Bwèndè bunene ne luse Lwèndè lunene. Nenku mpindyewu twìnyikàayaaku mitù yetu mu kaneemu. Mwanèètù Grant.



CIMANYINU LUA64-0308

(The Token)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu mapingaja, mu matùkù 8 a ngondo mwisâtù, cidimu cya 1964, mu Soul's Harbor Temple mu Dallas, Texas, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org